

6 7 8 9 30 1 2 3 4 5 6 7 8 9 40 1 2 3 4 5 6 7 8 9 50 1 2 3

卷三十八

娘子 小姐 姨娘 三姑六婆 孀婆 連珍 布衣 家生子 奴才  
底下人 阿 僧稱 牙郎 名賊 姦細 別稱 混跡 諱鬼  
雜種畜生 王八 綠頭巾 養瘦馬 冤家

卷三十九

累世同居 守節絕域不傳者甚多 為法自斃 鞭尸 剖骨  
威怖兒啼 千里駒 五月五生子 同年月日時生 邊官最速  
仕官最久 射石沒羽有四人 虎渡河二人 廢蓼莪兩人 謫仙四人  
倒用印有三事 御溝流葉凡四見 捕鱈魚二人 東南北道主人  
三武信君 四武安君 六萬石君 三三陸 兩三陸 三宋 四三王  
西三孫 三三楊 西赤松子 西洪崖 西四皓 西浩翁 三太山  
三十八學士 二四貴 西王八 二花蕊夫人 四參寥 西辨才 西藕心

卷四十

五官並用 以官編集 自書奏牘 世壇書名 世權文字 著述最  
作文最速 書家代筆 文人相輕 竊人著述 武將能詩 尉將  
古來用兵兵多者敗 取蜀將帥不利 臨陣不自操吳 解散洋兵  
兵富難戰 紙寫木鳩畫獅 火馬火孫 陷敵敗歸 事急為僕免禍  
口打賊 縱賊 懸賞贖賊 賊稱



15  
1226  
6



1226  
6

陔餘叢考卷三十八

陽湖 趙翼 雲崧

娘子

韻會娘字本少女之稱北齊裴讓之誚祖珽曰老馬十  
歲尚號騮駒一好耳順強稱娘子可見娘為少女自昔  
已然北史后妃傳序高歡妃有馮娘李娘王娘穆娘南  
史劉孝綽妹嫁徐悱才尤清拔人謂之劉三娘唐書太  
平公主起兵應高祖號娘子軍楊貴妃初入宮有寵宮  
中號曰娘子崔令欽教坊記范漢女大娘子亦是竿木  
家有姿媚花藥夫人宮詞諸院各分娘子位昌黎祭女  
孥文稱四小娘子祭姪孫女李干妻稱李氏二十九娘

子東坡爲子邁求婚啓云伏承令子第二小娘子金史  
海陵以第二娘子大氏爲貴妃第三娘子蕭氏爲昭容  
是皆以娘爲少女之証也然呼母爲娘亦始於六朝木  
蘭詩不聞耶娘喚女聲南史竟陵王子良傳武帝爲縣  
令時與子良母裴氏不諧遣人送還都子良年小帝謂  
之曰汝何不讀書子良曰娘今何處何用讀書北史常  
世康傳世康欲引退與子弟書曰娘春秋已高溫清宜  
奉隋太子勇語衛王曰阿娘不與我一好婦亦是可恨  
阿娘謂母獨孤后也呼母爲娘則娘又爲尊稱矣杜詩  
爺娘妻子走相送亦謂母也宋史韓魏公傳宮中稱郭  
后爲大娘劉妃爲小娘龍川雜誌仁宗稱劉氏爲大娘

娘楊氏爲小娘娘則竟是母后之稱矣高宗宮中亦有  
兩劉娘子一喜誦經宮中呼爲看經劉娘子一善治饌  
宮中呼爲上食劉娘子則亦以爲尊稱而非以爲少女  
也蓋俗稱與古義往往不相合者如小姐之姐說文  
本蜀人呼母之稱而今世反以稱少女又北史南陽王  
綽傳綽兄弟皆呼父爲兄兄嫡母爲家家乳母爲姊姊  
婦爲妹妹此亦稱謂之可異者按呼母爲家家亦不獨  
北齊蓋六朝時南北皆如此琅琊王儼旣誅和士開等  
後主使人召之儼曰士開謀廢至尊剃家家頭使作阿  
尼臣故矯詔誅之家家謂母胡后尊兄若欲殺臣臣不敢逃罪若  
放臣願遣姊姊來謂後主乳母陸令萱後主見兵不解啓太后曰有

緣更見家家無緣永別又齊文宣以姪女樂安公主妻  
崔達拏嘗問公主達拏於汝云何答云甚相敬惟阿家  
憎兒文宣乃殺其母阿家謂其姑此北朝之呼母為家家也南  
史范蔚宗臨刑其妻罵之曰君不為百歲阿家作計蔚  
宗母泣責蔚宗仍以手擊其頸蔚宗妻云罪人阿家莫  
念此南朝之呼姑為阿家蓋亦因夫呼母為阿家故婦  
稱姑亦同也漢時又有呼母為社者淮南子說山篇東  
家母死其子哭之不哀西家子見之歸謂其母曰社何  
愛速死吾必悲哭社高誘註江淮人謂母為社也四朝  
聞見錄宋高宗欲以憲聖吳氏為后謂之曰俟姐姐歸  
當舉行此姐姐指母韋太后也憲聖曰大姐姐遠處北

方妾豈敢干此大姐姐謂高宗元妃邢氏也則南宋又  
有稱姑及正后為姐姐者

### 小姐

今南方僭紳家女多稱小姐在宋時則閨閣女稱小娘  
子而小姐乃賤者之稱耳錢惟演玉堂逢辰錄記營王  
宮火起於茶酒宮人韓小姐謀放火私奔是宮婢稱小  
姐也東坡亦有成伯席上贈妓人楊姐詩夷堅志傳九  
者好狎遊常與散樂林小姐綢繆約竊而逃不得遂與  
林小姐共縊死又建康女娼楊氏死現形與蔡五為妻  
一道士來仗劍逐去謂蔡曰此建康娼女楊小姐也此  
妓女稱小姐也

姨娘

姨本妻之姊妹之稱見爾雅及釋名又左傳莊十年蔡  
 哀侯娶于陳息侯亦娶焉息媯過蔡蔡侯曰吾姨也止  
 而見之是也然世俗又稱妾為姨娘亦有所本南史齊  
 衡陽王鈞五歲時所生母區貴人病便悲戚左右以餅  
 飴之不肯食曰須待姨瘥晉安王子懋七歲時其母阮  
 淑媛病篤有獻蓮花供佛者子懋流涕禮佛曰若使阿  
 姨因此和勝願諸佛令此花竟夕不萎二王皆呼母為  
 姨蓋姨本姬侍之稱二王所生母皆非正嫡宮中久呼  
 為姨故其子之呼母亦同耳

三姑六婆

輟耕錄三姑者尼姑道姑卦姑也六婆者牙婆媒婆師  
 婆度婆藥婆穩婆也

俗稱乳母曰阿孀亦曰孀婆其不乳哺而但保抱者曰  
 乾孀婆按漢時稱曰阿母讀如阿房之阿所謂長於阿  
 保之手也後漢書袁閔少時往省其父彭城相在途變  
 姓名人無知者既至府吏不為通會阿母出見之入白  
 夫人乃召入又陳忠傳帝愛信阿母王聖封為野王君  
 是漢以前皆稱阿母也至六朝始有孀婆之稱宋書何  
 承天年老始除著作諸佐郎皆年少名家荀伯子嘲之  
 為孀母承天曰卿當知鳳凰將九子何言孀母耶北史

陳會書考 卷三十一 四  
魏靜帝每云崔季舒是我嬭母謂政事皆與之商榷也  
北齊書陸令萱以乾嬭婆封郡君唐書哀帝二年九月  
詔封嬭婆楊氏爲昭儀第二嬭婆王氏先已封郡夫人  
今准楊氏例改封李商隱七不稱意內云少阿嬭又春  
渚記開施嬭婆年六十育沈氏二子爲人織履及緝紉  
之事以供之

### 連衿

爾雅兩婿相謂曰亞註云今江東人呼爲僚婿嚴助傳  
呼友婿嬭真子錄云江北人呼連袂又呼連衿也連衿  
二字見此

### 布袋

俗以贅婿爲布袋按天香樓偶得云三餘帖馮布少時  
贅於孫氏其外舅有瑣事輒曰令布代之布袋之訛本  
此

### 家生子

奴僕在主家所生子俗謂之家生子按法苑珠林記庸  
嶺有大蛇爲患都尉令長求人家生婢子及有罪家女  
祭之家生之名見此然漢書陳勝傳秦令少府章邯免  
驪山徒人奴產子師古注曰奴產子猶人云家生奴也  
輟耕錄引之以爲家生子之據更爲明切

### 奴才

黑人曰奴才世謂起於郭令公子儀諸子皆奴才之語

非也晉劉淵罵成都王穎曰穎不用吾言逆自奔潰真奴才也田嵩罵楊難敵曰若賊氏奴才安敢希覲非分王猛曰慕容評真奴才雖億兆之衆不足畏况數十萬乎魏爾朱榮謂元天穆曰葛榮之徒本是奴才乘時作亂唐末董璋反以書誘姚洪不聽城陷璋責之洪曰汝奴才固無恥吾義士肯隨汝所爲乎是晉唐已有此語按奴或作駑顏氏家訓謂貴游子弟當離亂之後朝市遷革失皮而露質當此之時誠駑才也又五代史朱守殷傳守殷少事唐莊宗爲奴後爲都虞候使守德勝王彥璋攻之守殷無備南城遂破莊宗罵曰駑才果誤予事

底下人

俗稱奴僕爲底下人南史陳伯之傳褚緡謁范雲雲不見緡怒曰建武以後草澤底下悉成貴人吾何罪而見棄唐洋州刺史趙臣議選舉疏有曰授官多底下之人修業抱後室之嘆

阿

俗呼小兒名輒曰阿某此自古然如漢武云若得阿嬌當以金屋貯之蜀先主謂龐統曰向者之論阿誰爲失魯肅拊呂蒙背曰非復吳下阿蒙阮籍謂王渾曰與卿語不如共阿戎談以及謝惠連之稱阿連唐武后之稱阿武婆韋后自稱阿爺之類亦有不連其名而直以次

陔餘叢考 卷三十一  
第呼之者魏略散騎皆以高才充選獨孟康以外戚得  
之人共輕之呼爲阿九梁書武帝謂臨川王宏曰阿六  
汝生活大可隋書文帝呼其弟瓚爲阿三五代史王從  
珂小名阿三莊宗見其勇曰阿三不惟與我同年其敢  
戰亦類我各處方言不同而以阿呼名遍天下無不同  
也 本朝國語亦以阿厄漪起而余隨征緬甸軍中翻  
譯緬文亦多阿喀拉等音凡發語未有不起于阿者嘗  
細思其故小兒初生到地開口第一聲卽係阿音則此  
乃天地之元音宜乎遍天下不謀而同然也

僧稱

僧之稱釋家從釋道安始道安謂佛氏釋迦今爲佛子

宜從釋氏帛尸因請學佛者皆姓釋氏此僧家稱釋氏  
之始其曰比丘者臞仙原始秘書云稱佛爲牟尼謂德  
同仲尼也沙門爲比丘謂德同孔子也女沙門曰比丘  
尼謂德同孔子仲尼也葉石林避暑錄云晉宋間佛家  
初行其徒猶未有僧稱通曰道人按齊書莊嚴寺有僧  
達道人講座東昏至蔣山定林寺一沙門病不能避去  
藏草間帝將殺之韓暉光曰老道人可念是也僧之自  
稱則曰貧道顏竣傳釋僧舍謂竣曰貧道常見識記是  
也僧之稱和尚本於釋典羅云出家即羅佛命舍利佛爲  
其和尚大目犍連作阿闍黎故沙門以和尚爲尊貴之  
稱亦見香祖筆記



牙郎

輟耕錄云今人謂馮僧曰牙郎其實乃互郎主互市者也按此說本劉貢父詩話馮僧爲牙世不曉所謂道原云本謂之互卽互市耳唐人書互作牙牙互相似故訛也然舊唐書安祿山傳祿山初爲互市牙郎則唐時互與牙已屬兩字

名賊

士之有名者曰名士月令季春之月聘名士呂覽尊師篇爲天下名士顯人史記張耳陳餘魏之名士漢書田蚡傳進名士家居者貴之後漢書种嵩傳河南尹田歆當舉六孝廉其五人皆有貴戚書命不敢違歆欲自用

一名士乃以高應詔又黨錮傳陳蕃竇武欲誅宦官引用天下名士魏志荀攸傳何進徵海內名士攸等二十餘人又梁習薦州界名士常林楊俊等吳志孫策論太史慈曰子義青州名士終不欺我裴松之三國志註引漢末名士錄甚多是名士之稱起於秦漢也亦曰名流南史阮孝緒傳其爲名流欽尙如此是也亦曰名輩蔡摶傳其爲名輩所知如此又范泰傳宋武問謝混如泰者名輩誰比是也亦曰名家裴松之傳晉孝武元元中選名家以參顧問是也公卿有名者曰名公裴松之論鍾會名公之子聲譽夙著又郗原別傳河南張範名公之子宋書謝景仁傳武帝曰景仁爲名公之孫以其爲

謝安從孫故云蔡凝傳凝以名公子選尚信義公主是也亦曰名卿漢書王吉傳蓋執諸名卿可幾是也亦曰名臣魏正始中詔撰名臣奏議梁沈約論謝宏微古之所謂名臣宏微當之是也爲人父而有名者曰名父漢書蕭育傳王鳳以育名父之子除爲功曹齊書武帝稱劉景素名父之子是也爲將而有名者曰名將漢書樂布傳贊終爲漢名將李廣傳李廣程不識皆名將是也爲郡守而有名者曰名守南史齊明帝謝瀹徐孝嗣並爲吳興皆號名守是也醫之精於技者曰名醫南史李希邕傳母病名醫療之不能愈又智藏傳時號名醫是也番長之有名者曰名王漢書宣帝紀單于遣其名

王奉獻顏師古註名王者謂有大名以別諸小名是也獨漢書蕭育傳鄆名賊梁子政阻山爲害右扶風誅之又唐書高祖女平陽公主遣奴馬三寶諭降名賊何潘仁李仲文等各率兵會高祖名賊之稱大奇

姦細

舊唐書王賧傳云此輩降蕃翻作細作宋史紹興二年翟汝文與秦檜對案相詬目檜爲金人姦細

別號

月令大雩帝鄭康成註云帝上帝也乃天之別號別號二字始見於此然世之有別號古不經見吳萊三墳辨謂歸藏本黃帝之別號則別號起於上古韓詩外傳及

漢書古今人表謂帝嘗學於赤松子淮南鴻烈作赤誦  
子此又在黃帝之前則別號當以赤松爲首然歸藏乃  
黃帝書名赤松亦或周秦人所臆撰未必上古之人如  
後世於字名外別立一號以自標榜也別號當自戰國  
時始丹鉛錄云戰國策秦惠王時有寒泉子注云秦處  
士之號史記索隱云甘茂居渭南陰鄉之樛里故號樛  
里子又范蠡去越自號陶朱公又號鴟夷子皮又號海  
濱漁父蘇秦張儀皆師鬼谷子南華書有庚桑子秦漢  
間有江上丈人河上公之類皆後世所謂別號也然其  
人類多隱逸者流欲自諱其姓名而爲此非如後人反  
借此以自標異也兩漢之時尙少其見於史傳者惟商

山四皓綺里季角里先生等四人至今終莫知其姓氏  
又封君達號青牛師程高醫術自言得一老父號涪翁  
者至晉而陶潛號五柳先生南齊臧榮緒號被褐先生  
梁陶宏景號華陽隱君人間書札卽以隱君代名又痊  
鶴銘有華陽真逸說者謂卽宏景別號或以爲顧況別  
號北史李昭徽將妻子入嵩山號黃冠子李綽常逸游  
放恣自號隱君李公緒自號達生丈人鄭道昭號中岳  
先生則別號之風漸開然尙皆畸人逸士好奇弔詭者  
之所爲卽至有唐如李淳風之父號黃冠子王績號東  
臯子又號無心子田游巖號由東隣鄧世隆號隱元先  
生張薦號史遁先生鄭薰號七松處士賀知章歸老後

號四明狂客又號秘書外監元結號漫郎又曰聾叟又曰琦玕子郗純號伊川田父陸羽號桑苧翁陸龜蒙號江湖散人又曰天隨子又曰甫里先生張志和號烟波釣叟又曰元真子司空圖號耐辱居士亦皆巖棲谷汲隱居不仕或仕而歸田者乃有此號至達官貴人則自以官位相呼不聞別署一號以托高致也達官貴人之有別號蓋始於宋之士大夫亦謂之道號如長樂老六一老泉半山東坡之類相習成風遂至販夫牙僧亦莫不各有一號宋人小說載某官拿獲一盜責其行劫盜輒曰守愚不敢詰之則守愚者其別號也盜賊亦有別號更何論其他矣近有人訊別號詩曰孟子名軻字未

傳如今道號却紛然子規本是能言鳥又要人稱作杜鵑可爲一笑也輟耕錄吾子行云唐人雖有道號却不曾刻人印章別號刻印亦自宋人始

古人雖無別號而學行足以服人人自有加之美號者如東觀漢紀每臘賜博士羊甄宇獨取最瘦者後詔問瘦羊博士所在京師人因以號之後漢書伏生之後世傳經學清淨無競州人號爲伏不鬪董宣爲洛陽令人號爲卧虎鄭均家居年老賜尚書祿人號爲白衣尚書張霸年數歲卽知孝讓入號爲張曾子魯匡有權術人號爲智囊江革至孝人號爲江巨孝黃憲德甚高袁閔稱爲顏子楊震博學諸儒稱之曰

關西孔子廖扶高行人稱爲北郭先生馬瑤隱沂山人號爲馬牧先生以及漢末三君八俊八顧八及八厨之類黨錮傳所謂海內希風之流共相標榜天下名士爲之稱號也南史宗元卿性至孝鄉里號曰宗會子蔡曇智人稱蔡會子何伯璵人號爲何展禽膝曇恭至孝王儉稱爲滕會子周續之通十經人稱爲顏子徐陵早慧慧雲師亦稱爲顏回孔休源多識典故人稱爲孔獨誦許懋明於故事時稱爲儀註學江祐又稱之爲經史笥唐書李守素淹通譜學虞世南稱爲肉譜張鷟工文詞如青錢萬選員半千稱之爲青錢學士殷踐猷博學人稱爲五總龜谷那律淹貫羣書褚遂良稱之爲九經庫王起博學人號當世仲尼賈會有高節人稱關中曾子裴敬彝以孝行文學重於時人號爲甘露頂薛大鼎爲滄州鄭德本爲瀛州賈敦頤爲冀州皆有治行人稱爲錨脚刺史北夢瑣言趙光逢風神秀異人稱爲玉界尺元史廉希憲好孟子人稱爲廉孟子明史永樂中周新爲御史人曰爲冷面寒鐵魯穆爲福建僉事人呼爲魯鐵面李綱巡按南畿罷駐吏四百餘人稱爲鐵御史黃紱剛直人呼爲硬黃馮恩劾汪鉉被逮朝審時與鉉爭詈時謂其口膝膽骨皆鐵稱爲四鐵御史

混號

世俗輕薄子互相品目輒有混號呂氏春秋簡選篇夏桀號移大犧謂其多力能推牛倒也此爲混號之始史記酷吏郵都人號爲蒼鷹嚴延年人號爲屠伯漢書宣帝求得外祖母王媪乘黃牛車詣闕百姓謂之黃牛媪後漢書郭況家富號金穴馬援稱公孫述爲井底蛙蜀志孔融稱袁術爲塚中枯骨顏師古匡謬正俗人呼董卓爲董磔魚蔡典略記彌衡稱荀文若可借而弔喪趙稚長可監厨請客魏志許褚多力而癡人稱爲虎癡世說晉張湛好于齋前植松柏袁山松出遊好令人歌輓時人謂張屋下陳屍袁道上行殯晉書羊曼人號爲轆伯載記李特之先自巴西至楊車坂抄掠行旅人號爲

楊車巴干寶撰搜神記人謂之鬼董狐南史宋武帝少未涉學及爲相頗慕風流有所談論人不敢忤惟鄭鮮之難必切至帝感其輸情終厚之時人謂鮮之爲格佞沈慶之患頭風嘗着狐皮帽羣蠻惡之號曰蒼頭公殷景仁號殷鐵范蔚宗以香名嘲朝士謂庾仲文爲麝香何尙之爲零藿沈演之爲簷糖羊元保爲棗餈徐湛之爲甲煎慧琳爲蘇合孝武帝狎侮羣臣多鬚者謂羊顏師伯缺齒號之曰齧劉秀之儉恡謂之曰老慳王元謨本北人號之曰老儻廢帝以湘東王或肥大盛以竹籠謂之豬王以建安王休仁爲殺王以山陽王休祐爲賊王齊東昏時奄人王寶孫有寵號爲張子梁武時陸驗

容貌特醜人號為生犀劉胡面均黑人號均胡蕭惠開  
 在蜀嚴猛人謂之卧虎蕭坦之肥黑語聲嘶人號為蕭  
 啞北史古弼頭尖魏道武名之曰筆頭時人呼為筆公  
 元暉與盧昶為魏宣武帝所寵人號曰餓虎將軍飢鷹  
 侍中李崇在淮南亦號曰餓彪許惇為主簿以明斷稱  
 人號為入鐵主簿惇美鬚人又號為長鬚公谷楷眇一  
 目性暴酷人號為瞎谷武元暉每向臺駕赤牛人號赤  
 牛中尉元慶智為主簿事無大小得錢乃判或十數錢  
 或數十錢時號十錢主簿魏明帝為太子時郭祚以黃  
 珮奉之祚又與應詔趙桃弓相附人號為桃弓僕射黃  
 珮少師祚子景尚善事權勢人號為郭尖宇文忠色黑

裴伯茂呼為黑字邢昺好忤物人謂之牛副李象使于  
 梁談者謂李象圖李世哲善事人人號為李錐柳遠無  
 拘檢人謂之柳遠諸葛穎好譖毀人時號為冶葛宗道  
 暉好着大履冀州人語曰顯公鐘沙門名宋公鼓宋安德太守宗道  
 暉嚴李洛姬杜洛姬謂之四大梁彥光官相州政弛緩人  
 呼為戴帽陽崔暹貪酷人呼為癩兒刺史侯景呼韓軌  
 為噉豬腸兒河南人笑河北人食榆謂之踏榆賊唐書  
 崔日知為太常卿自以歷朝久每朝集常與尚書同列  
 時號尚書裏行竇從一娶韋后乳母為妻世謂媪婿為  
 阿翁時人因呼從一為國翁盧藏用隱終南山有意當  
 世人目為隨駕隱士姚崇當國盧懷慎不能有所建白

人稱伴食宰相酷吏周興人呼爲牛頭阿婆李林甫傾  
險人呼曰李猫來真善擊賊賊呼爲來嚼鐵裴寬貧時  
衣碧瘡面長人呼碧鵲雀張公素眼多白人稱白眼相  
公常袞爲相政事壅滯人謂之韜伯竇鞏與人言若不  
出口世稱囁嚅翁竇申倚其叔參勢招權納賄人目爲  
喜鵲王志愔政嚴厲人呼曰皂鵬杜悰爲相未嘗薦士  
時號秃角犀令狐綯執政其子瀉用事人號白衣宰相  
崔休四拜宰相人號崔四入唐時宦官多閩人杜宣猷  
爲觀察使歲造祀奄人墓時號敕使墓戶于頔在襄陽  
驕縱不法初襄陽髹器名天下謂之襄樣至是以頔故  
凡方鎮不法者皆謂之襄樣節度鄭絜作詩爲俳諧語

故使落調人稱爲歇後鄭五路嚴與韋保衡當國勢動  
天下人目其宅爲牛頭阿旁言如鬼陰惡也李匡威殘  
暴人稱金頭王張鷟朝野僉載武后時張元一好品題  
以趙廓渺小起家御史謂之梟坐鷹架魯孔邱爲拾遺  
有武夫氣謂之鷲入鳳池蘇味道有才識爲九月得霜  
鷹王方慶體質鄙陋爲十月被凍蠅婁師德長大而黑  
一足蹇爲行轍方相吉頊長大好昂頭行視高而望遠  
爲望柳駱駝袁本身黑而瘦爲嶺南考典朱前疑身體  
垢膩爲光祿掌饈東方虬身長衫短爲外軍校尉唐波  
若矮短爲鬱屈蜀馬長孺子視望陽爲呷醋漢蘇微舉  
止輕薄爲失孔老鼠而張元一腹粗脚短吉頊亦目之



爲逆水蝦蟆又侯思正好食籠餅每縮葱和肉其中人呼爲縮葱侍郎朱隋侯姿少媚爲臞亂土梟賀若瑾眼皮急項又粗爲飽乳犢子又魏光亦好品題朝士以姚元之長大行急爲趨蛇鸛鵲盧懷慎好視地爲覷鼠貓兒姜皎肥而黑爲飽樵母猪倪若水黑而無鬚髯爲醉部薄精齊處冲好眇目視爲暗燭底覓蝨老母呂延嗣長大少髮爲日本國使人又曰鄭勉爲醉高麗蔡孚爲小州醫博士張孝嵩爲小村方相楊仲嗣爲熱鏃上猢猻袁輝爲王門下彈琴博士魏恬爲祈雨婆羅門李全交爲品官給使李廣爲飽水蝦蟆而張鷟旣號青錢學士有董方九舉不第號白蠟明經時人以之屬對又通

鑑李全交王旭爲御史專以酷虐爲事人號李爲鬼面夜叉王爲人頭羅刹中書舍人陽滔適當草敕而令史持鑰他出無舊本檢尋乃斷窻取之時稱斷窻舍人朱泚之亂源休姚合言收圖籍貯倉廩自比蕭曹人目爲火迫鄴侯北夢瑣言韋宙有積穀七十堆宣宗稱爲足穀翁夏侯籍爲人鄙穢人目爲夏侯驢子蘇楷無行人稱爲衣冠土偶夏侯攷少淪落人稱爲不利市秀才温庭筠貌陋人稱爲温鍾馗方干謁王龜大夫一見卽兩拜王答之未起問干又一拜時稱爲方三拜蔣侍郎凝貌甚美時稱爲水月觀音五代史李振爲朱温腹心每入京必有貶降人曰爲鴟梟劉仁恭爲小校時善穴地

攻城軍中號劉窟頭後唐莊宗優名李天下又優人郭從謙混名郭門高李罕之攻摩雲山居民盡殺之人號爲李摩雲明宗淑妃王氏有美色號花見羞崔協不識文字人號爲沒字碑廢帝時張敬達性剛人謂之張生鐵石晉時安重榮號安鐵胡高季興到處稱臣又好劫鄰道貢物人呼爲高賴子梁有驍將陳章號陳野叉慕容彥超黑色胡髯嘗冒姓閻人謂之閻崑崙馬幸孫爲相號爲三不開謂不開口以議論不開即以行事不開門以延士大夫也南漢劉鋹有肥妾號媚豬宋史韓通性剛嚴人謂之韓瞪眼其子病瘡人謂之橐駝兒李重進色黔人呼爲駝黑大王韓溥號唐故事人稱爲近

世間語英時敏于文人稱爲立地書

王繼勳善用鐵

鞭鐵槊鐵搥人稱爲王三鐵王彥昇好擊劍人稱王劍兒李沆爲相無所建白人稱爲無口瓠張士遜爲相無所可否人稱爲和鼓王珪爲相人稱三旨相公上殿云取聖旨下殿云領聖旨出語人云已得聖旨也魯宗道性骨鯁人目爲魚頭叅政劉安世強直人目爲殿上虎趙抃稱鐵面御史錢顛亦稱鐵肝御史王廷義好自大每言我當代王景之子人稱爲王當代王承祐爲團練使好言事人稱爲武諫官陳思讓酷信釋氏人目爲陳佛子祁廷訓形質魁岸而無才人呼爲橐駝姚內貲善戰夏人目爲姚大蟲燕瑛在嶺南括犀珠香藥以賂權

要人目爲香燕陳象輿董儼日夕會趙昌言第京師語  
曰陳三更董半夜蘇紳與梁適同在兩禁皆險詖人語  
曰草頭木脚陷人倒卓劉隨臨事明銳人稱水晶燈籠  
孫道夫亦有此稱葉祖洽逢迎宰相曾布人目爲小訓  
狐楊畏進於元豐顯於元祐遷于紹聖人目爲楊三變  
李邦彥爲相人目爲浪子宰相薛昂無學術爲大司成  
請罷史學哲宗斥爲俗佞王德擒夏將姚太師姚對欽  
宗曰被縛時但見一夜叉耳人呼爲王夜叉王俊善告  
訐號王鵬兒何羣性剛同舍生日爲白衣御史李先治  
信州有聲人目爲錯安頭言其貌陋而有才也在楚人  
又目爲照天燭以其明也章鑑與人多許可人目爲滿

朝歡張成戰酣則兩眼皆赤時號張紅眼又號張鶻眼  
李全將張惠多力人目爲賽張飛獨醒志姜遵知開封  
府人號姜擦子言其威也祥符中有王捷者善燒金人  
謂之王燒金詩話總龜劉吉南治河人呼爲劉跋河同  
時內侍石金振領河隄使尤苛急人呼爲石爆裂貢父  
詩話薛簡肅尹京以嚴爲治人號爲薛出油陳彭年竭  
精盡思以囚寵人謂之九尾狐宋中道穎利而么小蘇  
子美呼爲錐宋盛度體豐大丁謂疎瘦梅詢好薰香竇  
賓不事修潔時人謂盛肥丁瘦梅香竇臭皇祐中士多  
馳騫請托有一人號望火馬一人號日遊神崔遠風致  
峻整人目之爲釘座黎慶歷中有衛士震驚宮闕捕得

殺之御史宋禧言蜀有羅江狗宜畜之以警夜時謂之  
宋羅江御史席平鞠獄畢上殿仁宗問其事奏曰從車  
邊斤矣斬也時號車斤御史翰苑名談有吉水令治邑嚴  
酷馬道爲啄木詩諷之人曰爲馬啄木宋史王安石去  
位請以韓絳代而呂惠卿佐之二人守其成規不變時  
號絳爲傳法沙門惠卿爲護法善神又王景亮結一社  
專以嘲笑爲事人號其里曰豬嘴關以呂惠卿清瘦語  
次輒以手指畫謂之說法馬留邵篋高鼻圈髯以上殿  
泄氣出知東平謂之泄氣獅子陳和叔少通率暮年爲  
質朴之狀時謂之熱熱顏回孔文仲對策有爲痛哭嘆  
息之語和叔語人曰此可謂杜園賈誼也王平甫笑曰

杜園賈誼正可對熱熱顏回耳拊掌錄米芾好怪常戴  
俗帽衣僧衣人曰爲活卦影薛昂賦蔡京君臣慶會詩  
逢時可謂真千載拜賜應須更萬回時人謂之薛萬回  
蔡元度對客嬉笑人莫能測時稱笑面夜又洛中有稗  
將張師權好以甘言悅人時號蜜翁翁楊景宗爲章曆  
太后弟好以木槌擊人時謂楊骨槌靖康時京城破王  
時雍搜取婦女與金人時號爲金人外公又號賣國牙  
郎建炎進退志李綱奏曰方金人欲廢趙氏立張邦昌  
有吳玠莫儔傳道意旨京師謂之捷疾鬼紹興乙卯以  
旱禱雨諫官趙霈言請禁宰鵝鴨時稱鵝鴨諫議適聞  
金有龍虎大王來南侵胡致堂曰此間有鵝鴨諫議足

以當之有鄭廣者本海寇號滾海蛟後歸降授官所謂  
鄭廣有詩上衆官文武看來總一般衆官做官却做賊  
鄭廣做賊却做官者也周益公日記楊存中人號爲髯  
鬚以其多髯而善逢迎也亦見王梅溪集嘉定中御史  
羅湘上言越州多虎乞飭多方捕殺張次賢奏八盤嶺  
乃禁中來龍乞禁人行時有羅擒虎張尋龍之對宋孝  
宗夜與胡銓飲有宮人號滿頭花令出侍酒見銓所記  
玉音問答楊誠齋與尤延之相戲尤呼楊曰羊楊呼尤  
曰蝻蟬書問往來尤則曰羔兒無恙楊則曰彭越安在  
王梅運勾骨立有風味人號爲風流骸骨金陵府官妓  
有極瘦者府尹朱世英謂之生色髑髏開禧中有郭倪

爲殿帥自以爲卧龍酒後輒咏三顧頻煩之句後出師  
竟敗對客出涕時號爲帶汁諸葛道士吳含靈好睡人  
呼爲吳猱軒渠錄莊綽極懼江仲本呼爲細腰宮院子  
夷堅志宗室公衡善滑稽而寡髮人呼爲趙葫蘆湖州  
民許六以賣餅爲業人呼曰許糖餅潘姓者善理冥間  
事人呼爲潘見鬼陳州人蔡乙極凶惡貌又獐劣人呼  
曰取命鬼福州有丐者陳饅頭婺州一叟自稱養皮袋  
鄞人連生好酒每飲必插花于首人呼爲連花鄱陽張  
廿二面醜口濶人呼爲張鱖魚宋史韓侂胄當國值生  
日陳及之後至門已閉而闌未關遂僂而入當時有由  
竇尙書屈膝執政之謂楊安國少無賴以粥飯爲業人

呼爲楊鞍兒李全善用槍人呼爲李鐵槍梁成大爲史彌遠主搏擊人目之爲梁成犬又丁大全陳大方胡大昌同除諫官人目之爲三不吠犬賈似道當國漕帥朱浚每有扎稟事必稱浚萬拜時謂之朱萬拜癸辛雜識杭醫張防禦言語好異人目爲張風子趙孟頫造黑漆大船極工巧人號爲黑漆船至龔開所讚宋江等三十六人各有混號如尺八腿一直撞之類尤爲新異也金史景祖善啖人呼爲活羅<sub>大鳥也</sub>章宗時宮中有優人號玳瑁頭徒單恭爲總管嘗畫一佛像云當以金鑄之賦屬縣金而實不鑄金盡入其家時號金總管完顏訛可傳同時有兩訛可一曰草火訛可得賊好以草火燎之一

曰板子訛可嘗誤以牙牌爲板子也故時人以此別焉完顏定奴號三脆羹紇石烈牙忽帶號盧鼓椎以其好用鼓椎擊人也酷吏傳徒單思忠好以麻椎擊人人號麻椎相公李特立爲人短小鋒利人號爲半截劍馮璧號馮削雷淵爲御史至蔡州杖殺民之姦豪者凡五百人時號爲雷半千明史給事中胡以寧請禁食蝦蟆時號蝦蟆給事成化中帝久不與羣臣相見大學士彭時商輅力請司禮約以御殿日召對及見纔奏二事萬安居首卽頓首呼萬歲欲出時等不得已皆叩頭退中官以此戲朝士一時傳笑以安爲萬歲閣老又是時劉吉萬安劉珣爲相無所匡正時有紙糊三閣老泥塑六尙

書之謠吉在內閣十八年人目之爲劉棉花以其耐彈也宏治中元守直爲通政使王敞爲左通政姜清李浩爲參議時人謂元哭王唱姜辣李苦蓋元與王聲音俱不稱而姜急躁李氣促也又前明呼蜀人爲川老鼠以其善鑽也呼楚人爲乾魚以其善治鱉魚也呼江西人爲臘雞以元時江西人仕於朝者多以臘雞饋客也嚴嵩生日江西紳士畢集嵩長身聳立諸公俯趨高新鄭在旁笑嵩問故新鄭曰偶思及韓昌黎鬪雞詩大雞昂然來小雞悚而待是以笑耳又嚴嵩當國以萬案爲文選郎方祥爲職方郎人稱二人爲文武管家莆田陳愧齋爲翰林時客至呼茶夫人曰未煮公曰也罷又呼乾

茶夫人曰未買公曰也罷時因號陳也罷萬歷中蘇人有邱姓者勤於弔喪而形體短小人呼之爲邱的篤天啓中周應秋附魏奄每魏良卿至其第進豚蹄留飲時號煨蹄總憲又其時有東林點將錄以水滸傳中各混號加之士流李三才爲托塔李天王葉向高爲及時雨之類尤不可枚舉宏光時金陵名妓李香君號香扇墜至如歷代流賊如後漢書黃巾賊其大聲者稱雷公騎白馬者稱張白騎輕便者言飛燕多髭者號於氏根大眼者曰大目如此稱號各有所因以及歷山飛蝎子塊之類更難悉數矣沈括筆談吳人謂梅子爲曹公以嘗望梅止渴也謂鵝爲右軍以換鵝書也有士人遺醋梅

與燂鵝作書云醋浸曹公一甕湯燂右軍兩隻是物類  
亦有此雅號矣

諱龜

莊綽雞肋編浙人以鴨爲諱謂鴨僅一雄者不能生卵  
須二三雄始有子故俗以此爲諱也今俗以縱妻淫行  
者爲龜不知起于何時左傳宋有公子圍龜楚有鬬韋  
龜漢有京兆尹陳龜幽州刺史朱龜曹魏有典農劉龜  
北魏孝明帝以神龜紀年孝昌中有大臣叱列伏龜正  
始中有羽林監王元龜唐時宗室有楚王靈龜嗣曹王  
龜年大臣有崔從龜王龜劉崇龜李權龜庶僚有樂朋  
龜薛元龜協律有李龜年進士有張仁龜處士有陸龜

蒙道士有解元龜白樂天名其姪曰龜兒字文籍字夏  
龜張志和本名龜齡王甫字興龜賀知章稱股踐猷爲  
五總龜謂龜千年五聚問無不知也五代前蜀有京兆  
李龜禎宋則呂蒙正之父名龜圖其弟名龜祥卽夷簡  
之祖也何承矩之子名龜齡范雍之祖名從龜王大寶  
字元龜丁陟傳有員外郎董龜正畢士安傳有郎中王  
龜從陳堯封之子漸自號金龜子陳季常作龜軒東坡  
贈詩所謂人言君畏事欲作龜頭縮也江陰葛延之訪  
東坡于僮耳以親製龜冠獻坡坡答以詩楊時號龜山  
紹興中有侍御史黃龜年慶元中有直講彭龜年洪龜  
父王十朋字龜齡陸放翁築堂曰龜堂又以龜鼓作冠



高二寸許有詩云龜屋新裁二寸冠孟拱傳有隨守張  
 龜壽金宣宗詔趙秉文楊雲翼作龜鑑萬年錄元至正  
 中謝應芳自號龜巢老人所著有龜巢集又戴良自署  
 其居曰龜毛廬是唐宋以來並未以龜為諱也惟魏太  
 武斥宋文帝為龜鼈小豎夫何能為則亦僅喻其渺小  
 耳皮日休謁歸仁紹不得見因作咏龜詩北夢瑣言謂  
 夾蛇龜訊之硬  
 骨殘形知幾秋尸骸終是不風流頑皮死後鑽須遍只  
 為平生不出頭亦謂其不見客耳雞肋編又謂楚人諱  
 烏龜頭云郡城象龜形嘗被攻有術者教以繫其首而  
 破故諱之然所諱又是一義皆非謂縱姦也王阮亭池  
 北偶談謂諱龜自明始惟張江陵生時母夢一大龜因

名之後仍改名云按明人關莊駒陰冗記謂三山士人  
 鄭唐好訛謔嘗為一老人題真容曰精神炯炯老貌堂  
 堂烏巾白髮龜鶴呈祥有人橫讀之乃精老烏龜四字  
 也老人遂毀之此可為明人諱龜之証然所以諱之之  
 故終莫得其說也及閱輟耕錄記秀州多故家大姓其  
 子孫不肖廢敗蕩盡有金方所作詩嘲之曰興廢從來  
 古有之爾家忒煞欠扶持諸墳掘見黃泉骨兩觀番成  
 白地皮宅眷多為撐目兎舍人總作縮頭龜強奴猾幹  
 欺凌主說與人家子弟知撐目兎謂兎望月而孕以見  
 其不夫而姪也縮頭龜則以喻其夫也想其時已有此  
 諺語而入之詩也又堅瓠集張伯雨贈葉景修詩家藏

逸少籠鵝帖門繫龜蒙放鴨船龜蒙句訛其婦女不潔  
故藏一龜字云則諱龜起於元時無疑矣

雜種畜生王八

俗罵人曰雜種曰畜生曰王八後漢書西羌傳滇零等  
招集諸雜種晉書燕載記曰蠢茲雜種奕世彌昌此雜  
種之名所由始也漢五行志諸畜生非其類子孫必有  
非其姓者東漢時則又曰畜產後漢書劉寬傳坐客罵  
蒼頭曰畜生寬私遣人視之恐其自殺曰此人也而被  
罵畜產吾懼其死也北史高車傳其先匈奴單于生二  
女單于曰吾有此女安可配人當以與天乃築高臺處  
之三年有老狼守臺不去小女意其神欲嫁之其姊驚

曰此是畜生無乃辱父母妹不從遂爲狼妻子孫繁茂  
成高車國此畜生之名所始也隋文帝寢疾太子廣與  
陳夫人侍夫人爲廣所逼奔歸于上上怪其神色有異  
問之以實對上恚曰畜生何堪付大事獨孤誤我此又  
罵人爲畜生之明文也北齊熊安生以訟事欲訴徐之  
才和士開二人及相對時以之才諱雄士開諱安乃不  
敢自稱姓名但云觸觸生羣公晒之以其音同畜生也  
五代史王建少時無賴以屠牛盜驢販私鹽爲事里人  
謂之賊王八此又王八之稱之所始也金史亦有王八  
與王毅共守東明兵敗被執王八前跪將降毅以足踏  
之此則不可與王建並稱爲賊明人小說又謂之忘八

謂忘禮義廉恥孝弟忠信八字也

### 綠頭巾

明制樂人例用碧綠巾裹頭故吳人以妻之有淫行者謂其夫爲綠頭巾事見七修類稿又知新錄云明制伶人服綠色衣良家帶用絹布妓女無帶伶人婦不帶冠子不穿襦子然則伶人不惟裹綠巾兼着綠衣按唐史及封氏聞見記李封爲延陵令吏人有罪不加杖但令裹碧綠巾以恥之隨所犯重輕以定日數吳人遂以此服爲恥明之令樂人裹綠巾或本諸此也

### 養瘦馬

揚州人養處女賣人作妾俗謂之養瘦馬其義不詳白香山詩云莫養瘦馬駒莫教小妓女後事在目前不信君看取馬肥快行走妓長能歌舞三年五年間已聞換一主宋漫堂引之以爲養瘦馬之說本此

### 冤家

蔣津葦航記談引烟花記云冤家之說有六情深意濃有死無異心一也兩情相繫阻隔萬端二也臨岐分袂黯然銷魂三也山遙水遠相思不見閨也憐新棄舊怨深刻骨五也一生一死觸景悲傷六也

陔餘叢考卷三十九

陽湖 趙翼 雲崧

累世同居

世所傳義門以唐張公藝九世同居爲最然不自張氏始也後漢書樊重三世共財繆彤兄弟四人皆同財業及各娶妻諸婦遂求分異彤乃閉戶自搥諸弟及婦聞之悉謝罪蔡邕與叔父從弟同居三世不分財鄉黨高其義又陶淵明誠子書云潁川韓元長漢末名士八十而終兄弟同居至於沒齒濟北汜幼春七世同財家人無怨色是此風蓋起於漢末今按歷代義門見於各史孝義孝友傳者南史十三人北史十二人唐書三十八

人五代二人宋史五十人元史五人明史二十六人其尤盛者張公藝之先北齊東安王永樂隋大使梁子恭皆躬造而表其門至公藝又被唐高宗褒諭此一家而旌於三朝者也江州陳氏宗族七百口每食必共坐犬百餘亦共牢一犬不至羣犬不食已見五代史而宋史又載其家名昉者已十三世同居昉之後又六世大中祥符中曾擢其名延賞者爲員外郎此一家而見於兩史者也浦江鄭綺九世同居已載宋史而鄭文嗣又載元史鄭濂又載明史此一家而見於三史者也其不在孝友孝義傳而雜見於本紀列傳者魏書楊播及弟椿津總服同爨盧潛自祖至孫百口同居唐書李綱五世

同居崔元暉二世同居羣從皆寓郊墅自遠會食無別爨朱敬則與二從兄弟同居高崇文之先七世不異居崔邠四世共居李畬累世同居劉審禮再從皆同居遼史聖宗紀有遼州張庭美坤州劉興嗣道宗紀有慶州蘄文高奚人達魯錦州民張寶宋太宗紀有金鄉李光襲理宗紀有潭州李符度宗紀有高郵夏世賢皆累世同居而陸九淵傳其家累世義居李庭芝傳其家十二世同居元史趙毓家已三世同居至毓又申先訓汴梁女子李氏爲賊所執欲犯之氏罵曰吾家六世義門豈污賊乎此皆別見於孝義等傳之外者也又有正史所不載而雜見於他書者賈氏談錄博陵崔倕三世同居

貞元以來言家法者以鍾爲首鐵圍山叢談河東魏氏十三世不析居累代旌表義門湧幢小品周德威五世孫徙居上虞至宋有名承詔者已十世同居趙忭帥越聞於朝明隆慶中山西巡撫賀一桂題長治縣仇氏六世同居又連江楊崇亦六世同居此又正史之外見於紀載者也余同年大學士王惺園先代亦四世同居問其家法大率一家中推一人有才者爲主而尊卑皆聽令焉親疎無異爨婚娶無異禮以是心志一而食用儉故能保世滋大因考陸九淵傳謂推一人最長者爲家長家事悉聽命子弟分任家事田疇庖爨賓客之事各有主者明史鄭濂傳亦稱其家代以一人主家政可見

治家固不可無經久之法也家庭雍睦和氣致祥自必碩大蕃滋福祉駢集如楊播一門七郡守三十二刺史崔陲生六子一居輔相五任大僚宣宗賜其堂曰德星堂浦江之鄭余闕嘗表爲浙東第一家李文忠取浙亦嘗遣兵護之而貸以粟趙天羽又記明太祖嘗召濂獎之退朝語馬后后曰陛下以一人尙得天下今鄭一家三千人爲患何難太祖悟再召見將誅之問曰汝家何術能如是對曰無他惟不聽老婆言耳太祖大笑免之明史又記永樂中有傳建文帝在其家者遣使索之其廳事有十大櫃五貯經史五貯兵器以備不虞使者所發適皆經史其半不發乃免禍人以爲至行所感而湧

幢小品又記連江楊氏子孫互相乳哺家雞亦互相哺其子構宅三十六年無哭聲僅一老婦歿崇率子弟拜禱復活又十三年乃卒家無喪者四十八年豈非積善餘慶報施不爽有如是耶然楊播家七郡守三十二刺史後遇河陰之變盡爲爾朱氏所殺惟餘楊愔相北齊又爲常山王所害楊氏遂幾絕鐵圍山所記十三世同居之姚氏一旦大小死欲盡獨兄弟二人方居憂而弟婦又卒弟獨與小兒同處其亡妻每夕來哺兒兄聞弟室中有婦人聲疑爲妖魅伏刀殺之尋血跡所起則弟婦塚也婦家訟於官兄弟皆死獄中姚氏亦遂絕此又天理之不可曉者

守節絕域不傳者甚多

蘇武在匈奴十九年不屈節而漢書匈奴傳馬宏副光祿大夫王忠使西域爲匈奴所遮忠戰死宏被執亦不肯降至蘇武歸匈奴乃令其隨武歸其時又有楊信路充國等皆爲單于所留數歲始得歸張騫使月氏亦爲匈奴所得留十餘歲始與同行之胡人堂邑父脫歸魏遣于什門使於北燕爲馮跋所拘不降至二十二年魏燕通好乃得歸魏主嗣比之蘇武唐溫彥博爲突厥所執問以虛實不對置之陰山苦寒地及突厥歸欵始還宇文元璿亦奉使爲叱羅所拘數年始還高祖比之蘇武張騫鄭元璿陷突厥數年太宗許頡利可汗婚元璿

始得還太宗亦比之蘇武又契苾何力使賀蘭被執拔刀割左耳誓不屈太宗聞之許毗伽和乃得還以蕃人爲中國抗節尤絕奇也蔣儼使高麗被囚及高麗平始還崔倫使土蕃被執逼爲書約涇州降倫不從囚邏娑城六年始還陳行焉使土蕃論欽陵欲其拜不屈留之十年卒於土蕃遼使只刺里至高麗被留六年不屈後高麗降始得還南宋洪皓使金留十五年乃歸朱弁張邵使金亦皆留十餘年始歸又有陳過庭司馬朴膝茂實崔縱魏行可皆沒於金理宗時有王善使元留七年乃歸元世祖初遣郝經爲國信使使於宋通好賈似道方以鄂圍之解爲已功慮經至泄其情乃拘之真州至

伯顏南伐始禮而歸之被留於宋者凡十六年又月里麻思使宋議和宋將脅以兵欲降之不屈乃囚於長沙飛虎寨凡三十六年而死石天麟奉使漠北爲海都所拘二十八年始得還明太祖起兵江左使汪河至擴廓所被留六年明兵至河南擴廓走乃得還此皆抗節絕域歷久不變者今蘇武事嘖嘖在人口洪皓朱弁士大夫尙有能記之則猶兼以文學傳也若馬子月里諸公則罕有舉其氏名者矣又蘇武射雁一事乃常惠教漢使者言天子射上林得雁足有帛書知武等在某澤中所以使單于不敢隱匿非真有雁書實事也經則在真州得一雁題詩於帛以繫其足放去

其詩云霜落風高恣所如歸期何首是春初上林天子援



弓繳窮海狐  
臣有帛書

果為汴民射得於金明池遂以進世祖然則蘇武雁書乃托辭而經雁書則實事尤絕奇也

袁楠題郝伯常雁足

詩未云一寸蠟丸憑雁  
寄明年春盡竟生還

為法自斃

史記秦商鞅為令使民為什伍而相收司連坐告姦者與斬敵首同賞不告者與降敵同罰後鞅得罪出亡民莫敢留鞅嘆曰為法自斃一至此乎宋書劉毅為劉裕所破夜投牛牧佛寺先是桓蔚之敗走投此寺僧昌藏之毅殺昌至是寺僧拒之曰昔亡師為劉衛軍所殺今實不敢容異人毅乃嘆曰為法自斃一至於此遂縊而死唐書路巖為相嘗請三品以上得罪誅者別取喉驗

其死及巖流儋州賜死亦別取喉五代史蘇逢吉陷李煜族誅後逢吉隨隱帝軍敗自殺周太祖梟其首正當李煜被刑之所閩主璘時薛文傑擅權會吳兵來伐閩士卒欲得文傑以快心方肯出戰乃檻送文傑於軍前先是文傑以古制檻車疎濶更為之如木櫃攢以鐵釘自內向動輒觸之車成文傑首自入焉癸辛雜識春州母可畏竄逐者必死盧多遜貶朱匡時知開封府李言朱匡雖海外水土無他惡春州在內地而至者必至改之後月餘符坐事上怒甚遂以符知春州至州以死續通鑑宋章惇為相貶蘇轍雷州司戶叅軍不任官舍遂僦民屋惇又以為強奪民居下州追治以

儼券甚明乃止及惇敗亦謫雷州儼舍於民民曰前蘇公來爲章丞相幾破我家今不可也

鞭尸呂氏春秋及淮南子但言鞭北史王僧辨爲陳

史記伍子胥以吳兵破楚求昭王不得乃掘楚平王墓出其尸鞭之三百呂氏春秋及淮南子但言鞭北史王僧辨爲陳

霸先所殺其子頌逃入北朝在隋伐陳之役從韓擒虎

先鋒渡江及陳滅頌客召父在時士卒千餘人對之涕

泣其問壯士曰郎君讐恥已雪而悲不止將不爲霸先

早死不得手刃之耶請發其墓斲觀焚骨頌頓頽陳謝

額盡流血曰其墳甚大恐一宵發掘不及更至明日事

乃彰露乃各具鍬鍤夜發其陵剖棺見陳武帝鬚皆不

落其本皆出自骨中遂焚骨取灰投水飲之自縛歸罪

晉王廣表其狀文帝特不問

自剖骨

三國志關壯繆嘗爲流矢所中貫左臂後創雖愈每至

陰雨嘗痛醫曰矢鏃有毒毒入於骨當刮骨去毒公便

伸臂令劈之時方與諸將飲臂血流於盤器而公言笑

自若此壯繆事嘖嘖在人口者也吳志留贊因討賊一

足被創屈而不伸乃以刀自割其筋氣絕良久已而足

伸瘡愈北史長孫子彥墜馬折臂肘上骨起寸餘乃命

開肉鋸骨流血數升言戲自若人以爲踰於關羽宋史

太祖在周世宗時乘皮船入壽春濠中城上發連弩射

之矢大如椽牙將張瓊以身蔽之矢中瓊髀鏃着骨不可出瓊飲酒一大卮令人破骨出之流血數斗神色自若劉遇足有灸瘡痛醫謂火毒未去遇卽取刀割瘡至骨曰火毒去矣談笑如常馬懷德流矢中額鏃入於骨以弩弦繫鏃發機而出之姚麟中矢透骨亦以强弩出之韓世忠中毒矢入骨亦用强弩括取之元史趙叵刺與宋將咎萬壽戰矢鏃中左肩不得出元帥取罪囚剖其肩視骨節淺深知可用卽鑿其創拔鏃出之叵刺神色自若

威怖兒啼

通鑑後趙將麻秋最勇猛人呼爲麻胡民間小兒啼怖以麻胡來輒止南史劉胡面黝黑爲越騎校尉蠻人畏之小兒啼語以劉胡來便止桓康驍悍所至爲暴江南人畏之以其名怖小兒畫其形於寺中病瘡者摹寫於牀壁無不立愈北史楊大眼威振淮泗童兒啼者呼云楊大眼至卽止高車國倍侯利奔魏勇健善戰北方人畏之嬰兒啼者曰倍侯利來便止唐書郝玼爲邊將獲虜必剗剔而還其尸虜大畏道其名以怖啼兒宋史劉錡傳錡少時與夏人戰屢勝夏人兒啼輒怖之曰劉都護來遼史邪律休哥敗宋兵宋人欲止小兒啼曰于越至輒止于越其官號也金史牙吾塔好用鼓椎擊人其名可怖兒啼世呼曰盧鼓椎

千里駒之稱見於漢魏六朝者不一而足漢書楚元王  
傳武帝召見劉德目爲千里駒魏志曹休傳休避亂至  
吳後北歸見太祖太祖譚左右曰此吾家千里駒也晉  
書傅咸年六歲列女杜憲見之曰千里駒也以其妹之  
女妻之載記劉淵謂劉曜曰此吾家千里駒也苻堅謂  
苻朗亦曰此吾家千里駒也南史宋武帝召見張敷目  
之曰真千里駒也邱仲孚少好學其從祖靈鞠稱爲千  
里駒王規少俊異叔父暕深器之曰此兒吾家千里駒  
也明僧紹見劉杳亦曰此兒實千里之駒梁武帝以姪  
暎聰敏謂袁昂曰吾家千里駒也王茂少時其祖深嘗

曰此吾家千里駒成門戶者必此兒也任昉少時從叔  
暎嘗謂阿堆吾家千里駒也北史魏太武徵李孝伯爲  
中散謂其從兄順曰真卿家千里駒也李伯尙少有重  
名魏孝文曰此李家千里駒也崔昂少孤祖孝芬嘗謂  
親友曰此兒終當遠至吾家千里駒也濟陰王暉業謂  
元文遙曰此我家千里駒杜杲學涉經史其族父纘嘗  
謂曰吾家千里駒也張乾威隋書作  
虔威性聰敏世父嵩謂人  
曰吾家千里駒也袁躍有儁才其兄翻謂人曰躍可謂  
我家千里駒也齊馮翊王潤幼時神武稱之曰此吾家  
千里駒也唐書張柬之目李嵩爲宗室千里駒又李千  
里初受封時武后謂曰兒吾家千里駒乃更名千里邁

史耶律的瑑伐高麗有功聖宗壯之曰真吾家千里駒也宋史宗室子漁有才蘇軾謂其父令鑠曰此公家千里駒也黃山谷見其甥洪芻詩曰不意江南澤中產此千里駒按魯連子齊有辨士田巴一日服千人有徐劫之弟子魯仲連年十二號千里駒能數言折巴巴謂徐劫曰先生乃飛兔也豈直千里駒而已則千里駒三字實起於戰國謂年少而有逸才者後遂以爲獎進後輩之佳稱耳

五月五日生子

世以五月五日生子爲不祥自戰國時已有此忌史記田文以五月五日生父命勿舉母私舉之文旣長問父

曰不舉五月子何也父曰生及戶損父文曰何不高其戶誰能至耶世說胡廣本姓黃以五月五日生父母藏之葫蘆投於河有人收養之及長有盛名父母又欲取之廣以爲背其所養則忘恩而無所歸乃托葫蘆所生姓胡名廣西京雜記王鳳以五月五日生父欲不舉其叔曰田文以此日生非不祥也乃舉之宋書王鎮惡以五月五日生其祖猛以爲此兒必興吾家乃名之曰鎮惡後果爲名將唐書崔信明以五月五日生太史占之曰五月爲火火爲離離爲文采日中文明之盛也果以文名又宋史趙元昊以五月五日生後嗣位日以強大此皆俗忌之見於史傳而卒不驗者也然亦有時而驗

者北史北齊南陽王綽以五月五日辰時生後主緯以是日午時生後綽為韓長鸞所譖搯死緯亡國後入周賜死綽死百餘日顏色如生俗云五月五日生者腦不壞癸辛雜識謂屈原以五月五日生投汨羅江而死近世翁應龍亦五月五日生後被刑湧幢小品謂宋徽宗五月五日生改天寧節於十月十一日終有五國城之厄遼懿德皇后五月五日生改坤寧節於十二月後亦以十香詞被乙革譖死豈惡月之說果有驗也

同年月日時生亦養之文昇育益谷父世父為邓子平家以人命推算休咎固是一術然兩人同年月日時則其吉凶當符合矣乃竟有絕殊者漢書盧縮與高

祖同日生而一為帝一為亡虜宋人小說載一軍校與趙韓王同年月日時生若王有一大遷除則軍校必有一大責罰有小遷轉亦必有小譴訶洛中士人張起宗與文潞公同年月日時見潞公軒轅過嘆曰同丙午生相懸如此有警者曰我與汝算命因算之良久曰好笑諸事不同但三十年後兩人當並案而食者九月後潞公退居於洛遊會節園聞園側有訓徒者則張也一見大喜問其年又同遂日日並案而食將及九月公之子及甫知河陽公往視之遂別自後歸洛亦忘之矣又蔡京命乃丁亥壬寅壬辰辛亥有都人鄭某者世以黛粉為業生子與京同八字謂且必貴遂恣其所為年十八

忽騎馬溺死可見星命之不足憑也然如軍校之與韓王遷除責罰節次相應則又何故夷堅志莆田士人黃裳與友戴松同年月日時生有推命者曰二命大略相似但黃君是正寅時戴君得寅氣淺當是丑末其發必在後既而戴但預薦年不滿五十不第而卒黃入太學始晚奏名然以病求岳祠歸雖登科食祿與戴不同然一紀殘廢與死爲隣所去亦無幾也此則境遇之相似者七修類稿謂沈石田與同郡盧知縣鐘年月日時皆同而仕隱不同又杭州吳叅議鼎與徐憲副之子應祥亦同年月日時吳既貴子亦登科而應祥皆無之王阮亭又記沈石田干支八字與明英宗同而貴賤相懸若

此意或時刻前後之不同也善乎呂才之論云漢高入關封侯者三百人豈無一人行衰絕運趙括四十萬人皆被坑豈無一人行生旺運梁溪漫志云若生時無同者則一時生一人一日止生十二人以一歲計之不過四千三百二十人而已而天下之大生人豈止此數哉則知同年月日時者甚多而富貴貧賤判然不一子平推命之說似又不足憑也

遷官最速

張璠漢紀荀爽有時名董卓秉政詔拜平原相行至苑陵追拜光祿勳視事三日策拜司空自布衣九十三日而至三公世語司馬懿辟州叅既至三十六日擢爲新

城太守懿使鍾繇調之曰君釋褐三十六日擁麾蓋乞兒乘小車抑何駛乎唐書宗秦客在武后時一歲中賜袍白青及紫人號四時仕宦白敏中自員外郎五年十三遷爲尚書右僕射門下侍郎封太原郡公李訓起流人一歲至宰相崔鉉爲李石荆南幕僚入朝不三載至宰相石猶在荆南柳璨起布衣至宰相不四載宋史蔡薤甫解褐除秘書省正字遷起居舍人未幾爲中書舍人自布衣至侍從纔九月向敏中自郎中拜右諫議大夫同知樞密院事纔百餘日至若陳自強以韓侂胄塾師除太學錄遷博士轉國子監博士遷秘書郎入館中半載擢右正言諫議大夫御史中丞入臺未踰月遂登

樞密自布衣至兩地纔四年明嘉靖中張璁釋褐六年卽拜禮部尚書大學士入閣夏言由給諫未浹歲至禮部尚書張居正以吏部侍郎入閣進禮部尚書去學士五品才歲餘萬歷中沈鯉由六品不二年至禮部尚書入閣王家屏去史官纔二年卽入閣至張綏附劉瑾一歲中自吏部郎擢左僉都御史超拜吏部右侍郎進尚書天啓中田吉由淮揚叅議附魏忠賢取中旨擢太常卿未匝歲至兵部尚書加太子太保此皆附權奸而速化者

仕宦最久

又有仕宦最久者有明一代尚書胡濙歷事六朝垂六



十年致仕歸王恕亦歷官五十餘年在吏部最久宏治間衆正盈朝皆恕力也英國公張輔之子懋嗣公爵六十六年握兵柄四十餘年劉珣之子銳八歲時憲宗賜中書舍人歷官五十餘年至太常卿嘉靖中猶供事內閣誥敕房又漕運總督郭鉉歷官五十七年

### 射石沒羽有四人

呂氏春秋養由基射虎中石矢乃飲羽韓詩外傳楚熊渠子夜行見石以爲伏虎而射之沒金飲羽下視乃知其爲石也史記李廣爲北平太守嘗出獵見草中石以爲虎也射之中石沒矢視之石也他日再射終不入矣北史李遠出獵有石在叢薄中疑爲伏虎射之鏃入寸

餘視之乃石

### 虎渡河二人

後漢書宋均爲九江太守多暴虎設檻捕之猶多傷害均至任虎渡江去劉昆爲宏農守先是崤黽驛道多虎行旅不通昆爲政三年虎皆負子渡河去劉昆事亦見王充論衡

### 廢蓼莪兩人

晉書王裒父修爲司馬文王所誅裒痛父不以命終絕世不仕每讀詩至哀哀父母生我劬勞未嘗不反覆流涕門人爲廢蓼莪篇南史顧歡早孤讀詩至哀哀父母生我劬勞輒執書慟哭受學者爲廢蓼莪篇

謫仙有四人

李白對酒憶賀監詩序云太子賓客賀監于長安紫極宮一見呼余爲謫仙人孟榮本事詩亦載此事是以世皆以李白爲謫仙其實謫仙人之稱不自白始也南史杜京產傳會稽山有人姓蔡不知名隱山中養鼠數千頭呼來卽來遣去卽去言語狂易時謂之謫仙又李白詩世人不識東方朔大隱金門號謫仙則白且以之稱曼倩矣白之後東坡亦稱謫仙王闢之滬水燕談錄子瞻文章議論獨出當世風格高邁真謫仙人也史季温亦曰山谷常呼李白及東坡爲兩謫仙按山谷詩喚取謫仙蘇二來李壁傳壁少穎悟屬辭精博周必大見其

文曰此謫仙才也

倒用印有三事

朱泚之亂德宗西奔泚遣將韓旻以銳師追之段秀實乃倒用司農印追回旻事見唐書及柳子厚集按五代史後唐魏王繼岌平蜀擅殺郭崇韜慮軍變李崧教以用黃紙僞作詔書倒用都統印告諭諸軍人心乃定又宋史郭威將反魏仁浦教威倒用留守印更爲詔令威誅諸將校將校皆懼遂從威反皆倒用印故事也

御溝流葉凡四見

御溝流葉事見於傳記者凡四其一唐人本事詩云顧况在洛偶與友遊苑中流水上得梧葉有詩云一入深

宮裏年年不見春聊題一片葉寄與有情人况於上游亦題云愁見鶯啼柳絮飛上陽宮女斷腸時君王不禁東流水葉上題詩寄與誰後十餘日有客又得水上一葉詩以示况曰一葉題詩出禁城誰人酬和獨含情自嗟不及波中葉蕩漾乘春取次行又明皇時楊虢寵盛宮娥皆怨嘗有書落葉隨御溝水流出云舊寵悲秋扇新恩寄早春聊題一片葉將寄接流人顧况聞而和之既達上聽遣出內人不少此皆唐人小說所記蓋卽顧况一事也其二雲溪友議盧渥舍人偶臨御溝見紅葉上有詩云流水何太急深宮盡日閒殷勤謝紅葉好去到人間其三北夢瑣言進士李茵遊苑中見御溝流葉

有詩與盧渥所得詩同

後僖宗幸蜀茵奔匿途遇宮娥雲芳子因

與同行具述宮中事會有詩書葉上卽此女也其四玉溪編事侯繼圖於大慈寺忽風吹木葉有詩云此字不書名此字不書紙書向秋葉上願逐秋風起天下有情人盡解相思死云云龐元英談藪謂前三則蓋本一事而傳記者各異耳劉斧青瑣集有御溝流紅葉記則又取前數則而易其名爲于祐云

捕鱷魚二人

韓昌黎傳潮州有鱷魚食民畜產且盡愈自往視之令其屬秦濟以一羊一豕投谿水爲文祭之其夕暴風起谿中數日水盡涸西徙六十里自是潮無鱷患此人所

共知也宋史陳堯佐通判潮州有張氏子與母濯於江  
鱷尾而食之母弗能救堯佐命二小吏操網往捕鱷竟  
帖弭受捕堯佐作文示諸市而烹之則竟殺鱷魚矣

東西南北道主人

俗稱居停主人爲東道本於左傳燭之武之詞舍鄭以  
爲東道主也後漢書彭寵傳朱浮對光武曰大王遺寵  
以所服劍佩倚以爲北道主人又常山太守鄧晨請從  
擊邯鄲光武曰不如以一郡爲我北道主人又光武指  
耿弇曰是我北道主人也洪容齋隨筆及都穆聽雨紀  
談俱引此以爲北道亦有主人之稱然不特此也魏書  
裴延儁傳咸陽王禧牧司州辟裴仲規爲主簿表行建

興郡事孝文自代還洛次郡境仲規備供帳朝於路側  
駕還謂禧曰昨得汝主簿爲南道主人六軍豐贍又唐  
鄭餘慶爲嶺南節度與羅讓善鄭還朝薦讓讓至謁鄭  
鄭指語坐客曰此吾南道主人也是又有南道主人矣  
大唐創業起居注帝遣書諭馮翊賊帥孫華華率騎數  
千至自邵陽帝厚加撫遇仍命華先濟爲西道主人華  
大悅而去是又有西道主人矣通鑑顏真卿起兵拒安  
祿山清河人李萼乞師於真卿且曰今當先擊魏郡執  
祿山所署太守袁知泰納舊太守司馬垂使爲西南主  
人是又有西南道主人矣至南史王僧辨討侯景晉州  
刺史魯廣達出境候接僧辨謂沈炯曰魯晉州亦是王

師東道主人也此則本左傳語

三武信君

張儀在秦惠王封以五邑號武信君陳涉使武臣為將軍與陳餘張耳略趙地武臣自號為武信君項梁立楚懷王孫心梁自號武信君俱見史記

四武安君

趙封蘇秦為武安君見國策秦封白起為武安君趙封李牧為武安君漢封田蚡為武安君俱見史記

六萬石君

史記石奮與長子建次子甲次子乙次子慶官皆二千石景帝乃名奮為萬石君漢書嚴延年兄弟五人皆至

大官東海號其母曰萬石嚴姬

師古謂一門之中五二千石也

馮勤有子八

人皆為二千石趙魏間榮之亦號萬石君此西漢之萬石君也後漢書秦彭傳秦氏世位相承有名襲者為潁川太守與羣從同時為二千石者五人故三輔號曰萬石秦氏此東漢之萬石君也唐張文瓘高宗時為侍中四子潛魏州沛同州皆刺史治衛尉卿涉殿中監父子皆至三品人謂之萬石張家宋史廖剛傳剛曾為工部尚書子四人遲過遂遠皆秉麾節人號為萬石廖氏此唐宋之萬石君也元史王磐世業農歲得麥萬石人號萬石王家則非關仕宦矣

六李杜二袁劉二鮑謝四蘇李三李郭兩元白

西溪叢語云後漢范滂母謂滂曰汝得與李杜齊名死亦何恨唐人謂李白杜甫爲李杜杜子美詩云李杜齊名真不竊實隱用此事云然後漢所稱李杜并不止此二人也滂母所云李杜乃李膺杜密後漢書黨錮傳所謂膺密俱坐黨禍而名行相次故時人稱李杜是也而膺密之先有李固杜喬皆爲梁冀所殺故後漢書上書乞李杜二公骸骨歸葬郭亮亦乞收固尸夏門亭長呵之曰李杜二公不能安土納忠卿曹何等腐生乃犯詔書乎此又一李杜矣梁冀誅後宦官用事白馬令李雲上書諫諍桓帝怒下雲北寺獄五官掾杜衆傷雲以忠諫獲罪上書願與雲同日死帝益怒下廷尉皆死襄楷

上書訟之謂李雲上書明主所當不諱杜衆之死諒以感悟聖朝太尉黃瓊亦上書言李固杜喬旣以忠言見滅李雲杜衆復以直道受誅此又一李杜矣魏書世宗詔王肅曰杜預葬於首陽司空李冲葬於覆舟忠義結於二世英惠符於李杜宜葬於預冲兩墳之間又傳修期亦遠慕杜預近好李冲買地葬二公間是預冲亦稱李杜則合之唐李白杜甫共有五李杜又宋史李韶與杜範皆廉直中外稱爲李杜則并有六李杜矣又齊高祖九錫文前云袁劉構逆實繁有徒此袁劉謂義興太守劉延熙晉陵太守袁標也後云袁劉攜貳成此亂階此袁劉謂袁粲劉彥第也是宋齊間有兩袁劉皆忠於

宋而被害於齊者西溪叢語又謂南史稱鮑照謝元暉  
爲鮑謝唐書鮑防與謝良弼友善人亦謂之鮑謝是古  
來共有二鮑謝漢時蘇武李陵稱蘇李唐時蘇味道李  
嶠亦稱蘇李明皇時蘇頲李乂對掌文翰明皇亦稱爲  
蘇李又東坡答李公擇詩云從來蘇李得名雙坡又欲  
與公擇稱蘇李也是漢唐宋又共有四蘇李唐李光弼  
郭子儀稱李郭宋史開禧用兵李汝翼郭倬取宿州畢  
再遇至虹遇二人裹瘡還再遇謂陳孝慶曰李郭軍潰  
賊必追躡是亦一李郭也然不可同年語矣吳梅村贈  
劉雪勅詩依稀李與郭流落今誰存則指前明神宗李  
太后之父傅及光宗皇后之父郭維城皆國戚也是又  
一李郭矣唐元微之白樂天並以詩名時稱元白金末  
元遺山爲一代文人之冠其時有白君舉字寓齋隰州  
人以進士官岐山令詩名與遺山相韻頽元白本世契  
兩家子弟每舉長慶故事相往來時人亦謂之元白一  
晉書陸機陸雲兄弟入洛人稱二陸魏書陸俟傳陸曄  
與弟恭之並有時譽孫惠蔚曰不意二陸近在座隅此  
又一二陸也宋史陸九齡與弟九淵相爲師友亦號二  
陸是古來共三二陸矣又陸機傳機雲尙有弟耽同時  
遇害孫惠曰不意三陸一旦湮滅南齊書陸慧曉之子  
僚任倖並有美名人稱三陸是古來又有兩三陸

宋郊宋祁稱二宋人皆知之按宋史藪人宋琪少通書史與同縣宋旌齊名人稱三宋登遼進士晉天福中始歸京師是又在郊祁之前又元史宋本諡正獻弟宋瑩諡文清人稱二宋是共有三三宋

漢書王章傳章為京兆尹吏民語曰前有趙張後有三王謂王尊王駿及章也又王鳳傳贊外戚興者有許史三王之家謂邛成侯及王商王鳳也唐滕王閣有三王則王勃作序王緒作賦王仲舒作修閣記也又王方翼子珣璠璿並以文學稱時號三王

兩二蘇

東坡穎濱兄弟並以文名世世稱二蘇按魏書蘇亮與蘇綽齊名人稱二蘇則又在坡穎之前矣

三三楊

明宣德中有三楊謂楊士奇楊溥楊榮也晉書楊駿與楊珧楊濟當國勢傾天下時人目為三楊新唐書楊憑傳憑與弟凝凌皆有名擢進士第時號三楊

兩赤松子

一神農時為雨師服水玉龍入火不燒蓋即張良所欲從遊者見劉向列仙傳一即晉之皇初平牧羊時所遣道士叱石成羊者見葛洪神仙傳又許觀東齋紀事亦



載之

兩洪崖

一三皇時伶倫得仙者號洪崖仙人衛叔卿與數人博於莘山石上其子問並坐者誰叔卿曰洪崖先生許由巢父耳郭璞詩左挹浮邱袂右拍洪崖肩卽此也其一唐張氲亦號洪崖先生按本傳及豫章職方記云氲晉州人洪州大疫氲至施藥病者立愈元宗聞之驛召之果氲也常服烏方帽紅蕉衣黑犀帶跨白驢從者負六角垂雲笠往來市間亦見許觀東齋紀事

兩四皓

漢有商山四皓齊書徐伯珍兄弟白首相對時人亦呼

四皓

兩涪翁

黃山谷晚年謫宜州自號涪翁按後漢書方術傳郭玉醫術師於程高程高之術得於一老父常漁釣於涪水自號涪翁則山谷蓋仿而襲之者也

三大小山

漢淮南王安招徠文學之士著爲篇章以類相從或稱大山或稱小山梁何嗣何點並甘棲遁世號點爲大山嗣爲小山明周肅王之後睦樗安胤俱有學行人稱睦樗爲大山安胤爲小山

三十八學士

亥徐養浩

卷三十九

唐太宗召名儒十八人爲學士番宿更休至形之圖書  
顧寧人日知錄畫內又有開元十八學士圖皆開元中  
人五代史馬殷開天冊府置官屬亦以廖光圖徐仲雅  
李宏皐拓跋常等十八人爲學士

二四貴

秦有太后穰侯涇陽高陵君稱四貴宋蒼梧王時蕭道  
成袁粲褚淵劉秉更日決事亦號四貴

兩王八

五代史王建僭號時人呼爲賊王八遼史聖宗時有安  
州團練使王八副馬保祐留守開京

一花藥夫人

花藥夫人本蜀王建妾號小徐妃也大徐妃生王衍小  
徐妃卽其女弟後二徐遊讎亡國唐莊宗平蜀後二徐  
隨衍入朝遭害於途及孟氏再有蜀孟昶時又有一花  
藥夫人卽作宮詞者也後隨昶歸宋昶死入內太祖亦  
頗惑之爲太宗所射死事見鐵圍山叢談

四參寥

莊子大宗師篇元冥問於參寥唐有道士名參寥見孟  
浩然集又唐末高彥休自號參寥子見本傳宋杭州僧  
名參寥見東坡集

兩辨才

唐有僧辨才藏蘭亭帖爲蕭翼騙去見畫苑宋有僧辨

才隱於西湖見東坡及淮海集

兩蘇小小

南齊有錢塘妓蘇小小見郭茂倩樂府解題南宋有蘇小小亦錢塘人其姊為太學生趙不敏所眷不敏命其弟娶其妹名小小者見武林舊事

咳餘叢考卷四十

陽湖 趙翼 雲崧

五官並用

北齊書唐邕手作文書口且處分耳又聽受此三官並用也南史宋劉穆之目覽詞義手答牋牘耳行聽受口並酬應不相參涉悉皆瞻舉此四官並用也隋書劉炫能左畫圓右畫方口誦目數耳聽五事同舉此五官並用也唐書張巡守睢陽士卒居人一見問姓名其後無不識崔涓守杭州初莅任不能盡識吏卒乃令各以紙署姓名傅襟上過前一閱後數百人指呼無誤則即用一官而已有不可及者

以官編集

南史王筠文章以一官編一集自洗馬中書中庶吏部左佐臨海大府各十卷尚書三十卷凡一百卷行於世宋史王延德掌御厨則爲司膳錄掌皇城則爲皇城紀事從郊祀則爲南郊錄奉詔修內則爲版築記從靈駕則爲永熙皇堂錄山陵提轄記蓋彷彿故事也宋史又載王承衍喜爲詩所至爲一集此則不必有官而以所處之地輒名其集近日查初白編詩亦援此例

自書奏牘

六朝人奏牘多自書今淳化帖有鍾繇表蓋三國時已然也晉書王右軍自書表穆帝使張翼寫題後答右軍

當時不別後方悟云小人幾欲亂真宋書衡陽王義季爲文帝所愛季素拙於書上聽使人書啓事惟自署名而已以親王愛子始聽令人代書則臣下奏牘自書可知也廢帝子業爲太子時啓參起居書迹不謹孝武責之曰書不長進此是一條耳可見太子亦自書也齊書謝朓守吳興表疏或有遲緩其弟朐在京輒代爲之明帝見非其手迹詰問乃知朐書南史王僧虔自書讓尙書表辭製旣雅筆迹又麗時人以比子敬王韶之傳韶之父偉之凡表奏輒手自書寫蕭思話傳蕭引工書陳宣帝嘗披奏事指引署名曰此字筆勢翩翩似鳥之欲飛

按自書奏牘本不自六朝始後漢書樊宏所上書輒手自書寫毀削草本楊賜疏末云臣謹自手書密上皇甫嵩前後上奏五百餘事皆手自書毀草不宣於外蔡邕上封事末云手書具對願寢臣表無令宣泄此皆因慎密之故非必以書法相高也六朝則書法盛行無人不從事於此遂無有不自書章奏者按魏晉世始重書法然漢書陳遵傳遵善書與人尺牘人皆藏去以爲榮後漢書北海靖王善書當世以爲楷則及病帝使驛馬合作草書尺牘十首又蔡邕書石經於鴻都門觀者車日數千輛則漢時已重書法但未如六朝之人人習書耳唐時則表章多有假他人

書者陽城劾裴延齡倩李繁書之繁卽以告延齡是也宣宗命柳公權自書謝章勿限真行亦以其時多倩人書者故特命自書耳宋胡邦衡諫和議一疏亦自書後高宗藏於德壽宮以爲賞玩其後幅已爲秦檜批汚孝宗命匠裁去重裱完善見邦衡所記經筵玉音問答又宋史張孝祥傳孝祥工書嘗自書奏牘高宗見之曰必將名世此又後世自書奏牘故事也

### 世擅書名

新唐書武后向王方慶索其先世羲之書方慶進一軸又上十一世祖導十世祖洽九世祖珣八世祖曇首七世祖僧綽六世祖仲寶五世祖騫高祖規曾祖褒并九

世從祖獻之等二十八人書武后御殿徧示羣臣詔中書舍人序其代閱號寶章集復以賜方慶

世擅文字

南史劉孝綽傳兄弟及子姪同時七十餘人並能屬文近古未有也王筠自序云世傳安平崔氏汝南應氏其家相繼以文稱然不過二三世而已非有七葉之中人人有集如吾門之盛者也江左之王可謂盛矣然不特文也卽書法亦然自羲獻之外先有丞相導大司馬敦太保宏太子詹事筠荊州刺史虞丹陽尹僧虔黃門侍郎渙之會稽內史凝之豫章太守操之中書令恬領軍洽散騎常侍徽之東海太守慈特進曇首衛將軍珣中

書令珣皆以書名合方慶所上家藏真跡觀之可謂世其家學者矣

著述最多

葛稚川著書六百餘卷梁武帝作通史六百卷金海三十卷制旨孝經周易毛詩尙書春秋中庸孔子正言等講疏二百餘卷吉凶軍賓嘉五禮一千餘卷贊序詔誥等文一百二十卷佛經義記數百卷金策三十卷簡文帝撰昭明太子傳五卷諸王傳三十卷禮大義二十卷老子義二十卷莊子義二十卷長春義記一百卷法寶連璧三百卷元帝著孝德忠臣傳各三十卷丹陽尹傳十卷註漢書一百十五卷周易講十卷內典博要百卷

連山三十卷詞林三十卷玉韜金樓子補闕子各十卷  
老子疏四卷懷舊傳二卷古今同姓名錄一卷式贊三  
卷文集五十卷此帝王著述之最富者也宋樂史著貢  
舉事二十卷登科記三十卷題解二十卷唐登科文選  
五十卷孝弟錄二十卷廣孝傳五十卷總仙記一百四  
十卷太平寰宇記二百卷總記傳坐知天下記四十卷  
商頌雜錄二十卷廣卓異記二十卷諸仙傳二十五卷  
宋齊邱文傳十三卷杏園集十卷李白別集十卷神仙  
宮殿窟宅記十卷掌上華夷圖一卷又編已作爲仙洞  
集百卷周必大著書八十一種又有平園集二百卷李  
心傳有高宗繫年錄二百卷學易篇五卷誦詩訓五卷

春秋考十三卷禮二十三卷讀史考十二卷舊聞証誤  
十五卷朝野雜記四十卷道命錄五卷西陲泰定錄九  
十卷辨南遷錄一卷詩文一百卷李燾作長編九百七  
十八卷總目五卷易學五卷春秋學十卷五經傳授尙  
書百篇圖大傳雜說各一卷七十二子名籍各一卷文  
集五十卷奏議三十卷四朝史稿五十卷通論十卷南  
北通守錄三十卷七十二侯圖陶潛新傳并詩譜各三  
卷歷代宰相年表唐宰相譜江左方鎮年表晉司馬氏  
本支宋齊梁本支王謝世表五代將相年表合爲四十  
一卷王應麟有深寧集一百卷玉堂類稿二十三卷掖  
垣類稿二十二卷詩考五卷地理考五卷漢藝文志考

證十卷通鑑地理考一百卷通鑑地理通釋十六卷通  
鑑答問四卷困學紀聞二十卷蒙訓七十卷集解踐阼  
篇補註急就篇六卷補註王會篇小學紺珠十卷玉海  
二百卷詞學指南四卷詞學題苑四十卷筆海四十卷  
姓氏急就篇六卷漢制考四卷六經天文六卷小學諷  
詠四卷此文人著述之最富者也

作文最速

南史劉穆之與朱齡石在武帝坐上答他人書自旦至  
日中齡石得八十函穆之得百函而穆之應對無廢謝  
莊出獄使爲赦詔使者立待詔成其文甚工齊書蒼梧  
王廢立之際蕭道成命劉係宗寫諸處分赦及四方書

疏使主書十人書吏三十人配之事皆稱旨北史徐紇  
傳有急速詔命數吏執筆紇或行或卧人別占之造次  
俱成北齊書李弼典樞密神武或造次不及宣教直付  
空紙卽令宣讀杜弼從高歡戰芒山大捷弼草露布卽  
書絹會不起草侯景叛入梁文襄命魏收爲檄五十餘  
紙不日而就又檄梁朝送景初夜執筆三更便成文過  
七紙陳元康傳隨齊神武軍行天寒雪深使人舉氈元  
康在氈下作軍書颯颯運筆筆不及凍俄頃數紙盧詢  
祖傳朝廷大遷除同日催拜詢祖立於止車門外爲二  
十餘人作表文不加點詞義可觀隋書高祖宴百官有  
神雀來集許善心卽於坐請紙筆賦之帝甚悅賜物二



百段煬帝不庭決事退朝後召虞世基口授世基承旨  
日且百紙從無遺謬唐書岑文本爲中書舍人或策令  
叢遽書吏六七人泚筆待分口占授咸無遺義劉禕之  
傳詔命叢繁禕之占授少選可待也蘇頌傳元宗平內  
難書詔填委獨頌爲中書舍人在太極殿後閣口所占  
授功狀百緒輕重無所差書吏曰丐公徐之不然手腕  
脫矣陸贄傳從狩奉天機務填總遠近調發奏請報下  
書詔日數百贄初若不經思逮成皆周盡事情人人可  
曉旁吏承寫不給贄沛然有餘柳公權傳爲學士時帝  
令賦詩公權應聲而成帝曰子建七步爾乃三焉劉瑑  
傳宣宗始復關隴裁處叢繁書詔夜數十瑑提筆便成

詞皆允切鄭畋傳討龐勛時書詔紛委畋爲翰林學士  
思不淹晷文成燦然無不切機要吳融傳昭宗反正御  
南闕融最先至帝有指授疊十餘紙融跪作詔書少選  
成語皆當帝意北夢瑣言韋臯設醮欲撰齋詞符載方  
陪侍命小吏十二人人分兩題載口占授之俄頃俱就  
宋史韓絳傳絳在翰林時景靈宮作神御十一殿夜傳  
詔撰十一殿上梁文遲明奏之鄧潤甫傳一夕草二十  
二制劉敞傳敞將下直會追封王主九人立馬却坐頃  
之九制成晁宗慤傳一夕草將相五制褒揚告誡各得  
其宜倪思傳故事學士一人當直如行三制則並宣學  
士思直夕孝宗欲試其才一夕併草四制王漢之傳一

日有詞頭三十三下筆立就應繇傳帝一夕召繇草麻  
夜四鼓五制皆就程秘傳寧宗崩丞相史彌遠矯詔廢  
皇子竑而立理宗秘直禁中一夕草七十五制遼史道  
宗時廷臣薦馬希白詩才敏妙十吏書不能給特召試  
之明史劉定之在閣奉旨製元宵詩中使卻立以待立  
成七言絕句百首又嘗一日草九制屠隆嘗戲命兩人  
對案拈二題各賦百韻詩咄嗟之間二章並就又與人  
對弈口自誦詩使人書之書不逮誦也陳際泰爲文敏  
甚一日可二三十首先後所作至萬餘首此皆文思最  
速見於史傳者也又唐書王勃傳勃兄勸爲鳳閣舍人  
會壽春等五王出閣有司具議忘載冊文羣臣已立乃

悟其闕宰相失色勸召主吏分占其詞粲然人人嗟服  
則并有不起草而臨時口占者又與北齊杜弼同一神  
速也

書家代筆

韻石齋筆談謂東坡時有丹陽人高述能仿公書趙松  
雪時有京口人郭天錫仿松雪書通宵董思白有門下  
士吳楚侯名翹後改名易以能書薦授中書爲諸生時  
思白頗拂拭之後思白官京師諸祈請思白翰墨者思  
白率令楚侯代之仍面授求者各滿志而去楚侯寓舍  
綾素堆積多於思白架上也然則今世所傳思白墨蹟  
大抵皆楚侯書耳

文人相輕

班固論揚雄曰凡人貴遠賤近親見揚子雲祿位容貌不足動人故輕其書王充論衡亦云畫工好畫古人不肯圖近世之士者尊古而卑今也貴鵠賤雞鵠遠而雞近也揚子雲作法言張伯松不肯觀以同時也使子雲在伯松前伯松必以爲金匱矣劉勰文心雕龍云韓非儲說始出相如子虛賦初成秦皇漢武恨不同時既同時矣則韓囚而馬輕豈非同時則賤哉此皆以同時見輕固世情之所不免然猶非彼此相忌而相軋也劉勰又云班固傳毅文在伯仲而固嗤毅謂下筆不能自休及陳思論才亦深排孔璋故魏文稱文人相輕非虛談

也則此習尚古已然北史魏收傳收與邢邵俱以才名互相訾毀邵云江南任昉文體本疎魏收非直模擬亦大偷竊收聞之曰伊常於沈約集中作賦何意道我偷任收從叔季景亦有才名李庶謂收曰霸朝遂有二魏收曰以從叔見比便是邪輪之比卿耶輪陳繼伯之子愚癡有名者也收以季景方之邢邵傳袁翻以文章位望稱先達嘗有貴人初授官大宴客翻與邵俱在座翻意主人必托己爲讓表主人竟命邵作之翻甚不悅每謂人云邢家小兒常客作章表自買黃紙寫而送之此皆文人相輕之陋習也隋劉松作碑銘示盧思道思道多不解乃發憤讀書後爲文以示松松亦多不解此則

非相輕而以相勵固不得以好勝議之矣

晉文竊人著述

顧寧人謂昔人著述往往自藏其名而托之於古人如

張霸百二尚書之類今人則好竊人詩文以為已作此

誠風尚之愈變愈下也

梁溪漫志云世所傳地里指掌圖極精博自足以傳乃托之東坡則宋人著書尚有托于他人者

然昔人亦有竊人著作者蔡邕疏云今待詔之士或竊

成文虛冒姓氏是漢末已有此風世說向秀註莊子未

竟而卒郭象遂竊為己注劉勰亦云排人美詞以為己

力寶玉大弓終非已有南史徐廣傳高平郗紹作晉中

興書以示何法盛法盛有意圖之謂紹曰卿名位貴達

不復俟此延譽我寒士無聞於時如袁宏干寶之徒賴

有著述傳後宜以為惠紹不與後法盛詣紹不在直入

竊書紹還失之無復兼本於是遂行何書唐摭言李播

典蘄州有李生者以詩投播覽之駭曰此僕舊作何乃

見示生愧懼曰某執公卷行江淮已久今乞見惠播曰

僕老為郡收此已無用便可相借生謝別播問何之生

曰將往江陵謁表丈盧尚書播笑曰秀才又錯矣盧乃

僕表丈何復冒此生惶恐曰承公假詩則并荆南表丈

一併見假播大笑而遣之葉石林玉澗雜書楊衡有一

一鶴聲飛上天之句最自負後因中表盜其文及第衡

自至京追之既怒問一一鶴聲在否曰此句知兄最惜

不敢輒偷衡乃解明楊士奇跋三禮考註云此書本吳

澄所作舊藏康震家後有晏璧者從康之孫求得之遂  
 掩為已作余見其所錄初本有稱澄曰者皆改作先君  
 曰有稱澄按者改作愚謂用粉塗其舊字而書之其迹  
 尚隱然可見此皆竊人著述之故事也至如玉澗所云  
 宋之間從劉希夷求年年歲歲花相似歲歲年年人不  
 同之句不得遂使人以計殺之則竊書賊而非為盜矣  
 按史記多采尚書孟子左傳國語世本楚漢春秋等  
 書或全用其文或摘敘其事班固作漢書凡武帝以  
 前皆取史記而刪節之又史記秦本紀贊全用賈誼  
 過秦論班書陳勝項籍傳贊亦全用過秦論及史遷  
 項羽贊此則書各專行不嫌引用並非掩其美為已

有也

武將能詩

王阮亭歷述古來武將能詩者宋沈慶之梁曹景宗北  
 齊斛律金北齊書斛律金不識字初名敦以其難乃改名金猶以為難司馬子如作屋况之其字始就則其所唱敕勒歌蓋本其國俗歌唱非  
 金自作也高敖曹唐王智興宋曹翰岳飛明郭定襄湯勤戚繼  
 光凡十一人阮亭所徵引博矣然如郭威諸公本有詩  
 名固亦不足為異此外又有絕無詩名而其句可流誦  
 者霍去病歌曰四夷既獲諸夏康兮國家安寧樂未央  
 兮載戢干戈弓矢藏兮麒麟來臻鳳凰翔兮與天相保  
 永無疆兮親親百年各延長兮南史梁武製武宴詩三  
 十韻示羊侃侃即席上應詔周羅暎參宴席陳後主曰

周左率武將詩每前成文士何爲後也孔範曰羅暎執  
筆成詩還如上馬入陣不在人後北齊書高敖曹好爲  
詩言甚鄙陋然其祭河神文曰河伯水中之神敖曹地  
上之虎行經君所故相酬決亦自爽快可喜則不特隴  
種一曲也後周書武將高琳在文帝席上賦詩云寄言  
寶車騎爲謝霍將軍何以報天子沙漠靜妖氛隋書賀  
若弼贈源雄詩交河驃騎幕合浦伏波營勿使麒麟上  
無我二人名唐書契苾何力本鐵勒人入唐爲名將梁  
修仁新作大明宮成植白楊於庭以示何力曰此木易  
成不數年可庇何力不言但誦白楊多悲風蕭蕭愁殺  
人修仁愧謝改植桐以蕃將能詠詩切諷尤絕奇也渾

城嘗慕司馬遷自敘乃作行紀一篇其詞不自矜大雖  
不言能詩而操筆自敘則能文可知北夢瑣言高崇文  
席上咏雪詩云崇文崇武不崇文提戈出塞號將軍那  
箇孺兒射落雁白毛空裏亂紛紛羅紹威武夫乘時竊  
據乃好爲詩慕羅隱詩認之爲叔自名其詩爲偷江東  
集以隱詩號江東集故也朱全忠起盜賊每覽太原記  
室李習吉書檄恨不得此人嘗曰以鄙夫之智算得習  
吉之才筆如虎之附翼也則全忠雖不能詩而其解文  
義可知至如高駢之煉汞燒銀二十年至今身在藥爐  
邊不知子晉緣何事只學吹簫便得仙依稀似曲纔堪  
聽又被風吹別調中等句則雖工於詩者亦不能及矣

楊文公談苑載武將劉吉文詩云一箭不中鵠五湖歸  
釣魚臨漢隱居詩話載武將張師本詩云舊將封侯盡  
降王賜姓歸又分鹿是非皆委夢落花貴賤不由人梁  
溪漫志記韓蘄王初不知書晚年能作小詞其臨江仙  
一首云冬日青山瀟灑春來山暖花濃少年衰老與花  
同世間名利客富貴與貧窮云云又七修類稿及錢琦  
語測記元伯顏南征回詩云電掃風煙過嶺馳王師到  
處悉平夷擔頭不帶江南物只插梅花一兩枝此或他  
人托爲之伯顏元初蒙古人豈暇讀書作此惟張宏範  
有淮陽集如讀李廣傳詩云但教千古英名在不得封  
侯也快人具見英雄本色詠燭淚之蠟花本是無情物

特向人前也淚流亦復纏綿有致王文祿龍興慈記徐  
武寧病亟太祖親臨問之達口占曰聞說君王鑿駕來  
一花未謝一花開蓋諷衆賢之待用也又萬歷中蕭如  
薰爲保定總兵能詩士趨之賓坐常滿此皆武將之能  
詩者記之以補阮亭所未備

鬪將

類要云兩陣旣立各以其將出鬪謂之挑戰王阮亭池  
北偶談謂古來真有鬪將之事非盡裨官之妄說而引  
劇談錄白敏中討吐蕃有緋衣會帥出陣召漢軍鬪有  
潞州小將馳馬出射中其頂抽劍踏之於鞍又李臨淮  
將白孝德斬賊將劉龍仙及五代史周德威生擒陳夜

義事爲證然不特此也春秋僖元年公子友帥師敗莒師於鄆獲莒拏傳云公子友謂莒拏曰吾二人不相說士卒何罪屏左右而相搏是春秋時已有此事矣漢書漢王與項羽軍廣武之間羽欲與漢王獨身挑戰漢王曰吾寧鬪智不能鬪力又羽使壯士出挑戰漢將樓煩輒射殺之三國志註引英雄記郭汜攻長安呂布謂汜且却兵但身決勝負汜布乃獨共對戰布以矛刺中汜汜後騎來救乃各兩罷晉書載記劉曜使平先追陳安安左手執大刀右手執丈八蛇矛近則刀矛俱發遠則馳射平與安戰三交奪其矛而還宋書衡陽內史王應之與何慧文捨軍身戰斫慧文八創慧文斫應之斷足

殺之南史魯爽反薛安都討之爽世梟猛安都直前刺之應手倒焦度與魏豹皮公遇交槩鬪豹皮公墮地陳慶之在懸瓠城魏驍將堯雄子寶樂最勇求單騎校戰慶之子昕躍馬直趨寶樂魏軍潰散梁書柳仲禮在青塘與侯景戰稍將及景爲支伯仁斫肩遂遁陳書北齊師至呂梁有西域胡善射吳明徹謂蕭摩訶曰若殪此胡則彼軍奪氣摩訶乃馳馬衝齊軍胡挺身出陣前十餘步摩訶擲銑鏡正中其額應手而仆徐嗣徽驍將鮑碎以小艦殿後周文育跳入碎舟斬碎仍牽其船而歸北史魏宗室可悉陵從征涼州沮渠茂虔令一驍將與陵鬪兩槩皆折陵抽箭射之墜馬恐其救至不及拔劍



以刃戾其頸斷之後周與北齊戰周將王雄追斛律光  
光左右皆散惟餘一奴一矢雄按稍不及光者丈餘謂  
光曰不殺爾當生擒以見天子光射中雄額雄退走至  
營而卒蔡祐河橋之戰東魏令厚甲長刀者直取祐祐  
俟其進至十步乃射之正中其面便以稍刺殺之北齊  
書綦連猛傳突厥逼晉陽陣中一騎將超出來鬪猛挺  
身獨出與之相對刺賊落馬因卽斬之後周書侯莫陳  
崇討万俟醜奴賊未成列崇單騎入賊中於馬上擒醜  
奴衆莫敢動隋書竇榮定征突厥阿波可汗遣人謂突  
厥曰士卒何罪但當各遣一壯士決勝負耳突厥乃遣  
一騎挑戰榮定遣史萬歲出應之萬歲斬其首而還揚

義臣傳漢王諒反遣喬鍾葵圍代州鍾葵有將王拔驍  
勇善戰義臣患之募能當拔者有車騎將軍王思恩請  
當之義臣曰壯士也賜以卮酒思恩望見拔乃投觴於  
地策馬赴之再往不尅爲拔所殺唐書單雄信直趨秦  
王尉遲敬德躍馬大呼刺雄信墜馬乃翼王出王世充  
子琬在竇建德軍中乘隋帝馬鎧甲華整以夸衆敬德  
與高甌生梁建方三騎出擒琬歸秦王討劉黑闥闥將  
高雅賢單騎逐李世勣勣將潘毛刺之墜馬秦叔寶傳  
每敵有驍將夸耀秦王輒命叔寶取之刺於萬衆中無  
不如志薛仁貴傳征高麗時高麗有善射者殺官軍十  
餘人仁貴單騎出擒之王難得傳土番贊普子郎支都

恃勇乘名馬挑戰難得馳出直斬其首室韋酋段普洛  
撥邊劉客奴單騎襲之斬首以歸張伯儀傳伯儀與李  
希烈將戰敗賊追及伯儀奮刀禦之兩刃相向不得下  
會救至乃免五代史劉守光將軍廷珪與周德威遇於  
龍頭岡曰今日必擒周陽五單騎逐之槍及德威背德  
威側身避之奮搥反擊廷珪墜馬遂擒之此又德威鬪  
將之一事不特阮亭所云擒陳夜叉也秦宗權使張晔  
圍汴屯於赤岡汴將張歸厚與晔獨戰陣前晔憊而却  
諸將乘之晔遂敗歸厚又從攻時溥見梁將陳璠叛在  
溥所瞋目馳騎直往取之晉李存孝救李罕之於澤州  
梁將鄧季筠出戰存孝舞稍擒之楚王殷使子希範討

高季興季興從子名從嗣單騎造楚壁請與希範決戰  
楚將廖匡齊出鬪拉殺之夏魯奇從攻幽州劉守光右  
將軍廷珪元行欽皆驍勇魯奇與二將鬪輒不能自解  
兩軍皆釋兵觀之宋史王君萬傳君萬略地忽一騎躍  
出才將及君萬側身避之回擊斬其首乃羌酋藥廝逋  
也侯益傳益初從唐莊宗與梁戰梁將李立李建以驍  
勇聞益挺身出鬪擒二將以歸侯延廣傳延廣獨與賊  
將劉渥鬪於大樹下斷其右臂張玉傳築青澗砦夏兵  
來爭有鐵騎挑戰者玉單持鐵簡出鬪取其首及馬還  
郭遵傳夏兵來寇陣出驍將楊言當遵遵揮鐵杵破其  
腦王珪傳夏軍有驍將持白幟植槍罵曰誰敢與吾敵

者槍直傷珪右臂珪左手以鐵杵碎其腦又一將以槍進珪挾其槍以杵擊殺之岳飛傳飛戰太行山單騎持丈八鐵槍刺殺黑風大王趙立傳兀术攻楚州立擁六騎呼曰我鎮撫也可來決戰有兩騎突出立奮矛刺之俱墜奪其馬而歸畢再遇傅靈壁之戰金將有持雙鐵簡躍馬而前再遇以左刀格其簡右刀砍其腦金將墜馬死金史太祖單騎追麻產麻產棄馬入葦中活蠟胡來問太祖曰此何人太祖曰麻產也活蠟胡遂進擒之以出毛子廉傳子廉入險阻中爲盧彥倫所圍兩騎突出直犯子廉射中其一其一人挺槍幾中子廉腹子廉避其槍與戰生擒之乃彥倫健將孫延壽也元史楊子

橋之戰姜才軍中一騎躍出直趨張宏範宏範旋轡返迎刺之應手而斃張柔傳攻宋滁州宋驍將突出執柔轡曳入其陣飛石中柔鼻兩軍鬪柔乃得還燕帖木兒傳王禪自上都興兵至榆河燕帖木兒禦之阿刺帖木兒以戈刺燕帖木兒將及燕帖木兒側身以刀格其戈斫之中臂明史熊天瑞據嶺常遇春圍之天瑞養子元震竊出覘兵遇春亦引數騎出猝與遇元震不知常遇春過之始覺遂單騎前襲遇春遇春遣從騎揮刀元震奮鐵搥且鬪且走遇春日壯士也舍之傅友德守徐州擴廓遣將來攻友德單騎奮槊刺其將韓乙遂敗去庭聞述略記也先入寇時有一騎搴旗一騎挾弓矢將薄

城下石彪出城一斧砍落其首又彙書記成化末劉千斤作亂康都督募紫微山僧惠通勦之僧直入賊營謂千斤曰汝抗朝命勞及老僧今與汝約各以氈裹兵器醮灰試鬪身有白點多者爲負汝負則當面縛以降賊許之兩人鬪至暮賊衣污滿乃詣軍門降又柳軒叢談黃得功裨將林報國被賊趙虎誘殺得功直入其陣斬虎有少年賊號無敵將軍者馳至欲取得功立功立擒之橫置馬上而歸此皆近代鬪將之事也

古來用兵兵多者敗

古來用兵往往兵多者敗蓋兵過多則號令不齊氣勢不貫必不能有臂指相使之用且爲將者有恃衆之意

而謀多疎爲兵者亦有恃衆之心而戰不力自三代以後能以多取勝者惟王翦滅楚以六十萬人韓信破趙以二十萬人垓下之戰漢兵六十萬人裴行儉破突厥擒阿史那奉職以三十萬騎郭子儀收復西京以三十萬衆明太祖取中原以二十萬衆征雲南亦以二十萬衆耳其他如冒頓以四十萬騎圍漢高於平城突厥始畢可汗以數十萬騎圍隋煬於雁門契丹以三十萬騎敗周德威於新城蒙古濶端以五十萬衆破曹友聞於大安軍此又當別論蓋北俗號令簡而心志一故能以多取勝中土所不及也至如明太祖破陳友諒亦以二十萬衆然友諒是時且六十萬則不可謂明兵之多也

其以多致敗者長平之戰趙括兵四十萬爲秦所坑章  
邯攻趙項羽破之被坑者且二十萬其多可知也漢高  
以五諸侯兵五十六萬人伐楚入彭城爲項羽三萬人  
所破溺死者二十餘萬龍且以二十萬救齊韓信擊斬  
之吳王濞兵二十餘萬周亞夫擊走之新莽時王尋王  
邑以四十二萬兵圍昆陽爲光武所破銅馬諸賊合數  
百萬亦爲光武所破官渡之戰袁紹兵十餘萬曹操兵  
僅十分之一擊破之赤壁之戰曹操治水軍八十萬周  
瑜以三萬人破之劉聰以十餘萬陳於洛西石勒以四  
萬人破之淝水之戰苻堅戎卒六十餘萬騎二十七萬  
其先至者已三十萬乃爲謝元等八萬人所敗呂光攻

龜茲龜茲王帛純引獯胡諸國兵七十餘萬爲光所敗  
葛榮向京師衆號百萬爾朱榮兵七千衆寡不敵葛榮  
聞之大喜令其衆辦長繩以爲至便縛取爾朱榮乃爲  
奇兵大破之及爾朱兆以二十萬攻鄴高歡馬不滿三  
千步兵不滿三萬大戰破之渭曲之戰高歡將二十萬  
衆宇文泰不滿萬人破之沙苑之捷宇文泰又以七千  
兵破歡十餘萬乃於戰所準當時兵數人種柳一株以  
旌功凡七千株後宇文泰又與歡戰雖斬高敖曹然是  
日置陣旣大首尾懸遠彼此不能相知遂大敗燒營而  
遁則亦以兵太衆也隋文帝滅陳合總管九十兵五十  
一萬八千皆受晉王節度然賀若弼韓擒虎先入建康

擒後主兵纔八千耳其時陳將魯廣達等陣於白土岡  
亘二十里乃爲賀若弼等所破煬帝征高麗凡一百十  
三萬人餽運者倍之竟潰於薩水宇文述等九軍共三  
十萬先度遼其脫歸者僅二千七百人竇建德之救王  
世充也置陳虎牢下長三十餘里爲秦王所擒突厥犯  
塞黑齒常之以二百騎破其五千騎安祿山之反也潼  
關之戰哥舒翰以二十萬衆爲崔乾祐所敗尹子奇兵  
十三萬張巡許遠以六千八百人敗之九節度之師潰  
於相州步騎共六十萬黃巢入潼關兵六十餘萬呼聲  
震河華及據長安李克用以四萬人破走之契丹將阿  
古只以騎兵五百敗老相軍三萬石晉杜仲威以三十

萬衆擊遼遼將高謨翰以三百騎殺其先鋒餘兵皆走  
遼天祚使蕭吼里步騎十萬討女真阿骨打兵三千七  
百至者僅三之一力戰破之遼又使邪律訛里朶等騎  
二十萬步卒七萬來伐阿骨打又敗之於阿婁岡遼又  
使蕭特末將騎兵五萬步卒四十萬討女真并遼主自  
將亦俱爲阿骨打敗於護步答剛張浚富平之敗兵四  
十萬人馬七萬匹宋將黃廸等以兵三十萬柵於文水  
縣金突合速以兵九千敗之殺八萬餘人時康民率兵  
十七萬撻不野敗之又以騎二千敗淮南兵十萬餘人  
及和尚原之戰兀朮以十萬衆爲吳玠所敗仙人關之  
戰撒离喝亦以十萬衆爲吳玠所敗劉麟劉猷三十萬

陳晉書 卷四  
衆楊沂中等破之於藕塘夏人二十萬騎李顯忠以所部八百人破之順昌之戰兀朮韓常兵十餘萬爲劉錡所破金主亮南侵兵六十餘萬虞允文敗之完顏九斤胡沙虎以四十萬衆伐蒙古敗於會河堡銀青衆二十萬亦爲蒙古木華黎所敗已而蒙哥以五十萬衆敗於宋台州城下遂死又察罕兵八十萬圍廬州爲宋杜杲敗去賈似道之潰於江上也兵十五萬凡此皆以多致敗歷歷可考者也其以少擊衆戰功最著者如合肥之戰張遼李典以步卒八百破孫權兵十萬後秦姚萇以千餘兵破雷惡地三萬餘衆乃命軍士各植一木於柵孔以旌功或疑營地大小萇曰吾自結髮以來未嘗如

此以少勝多者正以小爲奇耳高昂以十餘騎破爾朱羽生兵五千宇文忻以五百騎破尉遲迥精甲三千薛萬徹以百騎擊敗竇建德兵十萬薛仁貴以卒二千攻扶餘殺萬餘人馬嶙從李光弼攻史朝義於北邙以兵五百出入三反敗其衆十萬光弼曰吾未見以少勝多如馬將軍者李嗣源救幽州契丹萬騎遮山口嗣源以百騎衝破之楊業以數百騎出雁門破契丹兵十萬殺其將駙馬蕭咄李劉溝堡之捷劉昌祚以二千騎敗夏人萬騎李師中上其功謂西事以來以少抗衆未有如此者燕達以五百人抗夏人三萬騎九戰皆捷岳忠武以八百人破羣盜王善等五十萬衆於南薰門以八千

人破曹成十萬衆於桂嶺以崑背八百破兀朮於順昌  
又以五百破之於朱仙鎮皆敗其衆十餘萬金完顏陳  
和尚以四百騎敗蒙古兵八千於太昌原而尤最奇者  
宋武帝微時以數十人覘孫恩遇賊衆數千便與戰所  
將人俱死帝獨奮長刀所殺傷甚衆南齊周盤龍子奉  
叔單馬率二百餘人陷陣虜萬騎圍之一騎走還報奉  
叔已歿盤龍馳馬奔入時奉叔已大破虜得出在外不  
見其父復躍馬入父子兩騎縈繞於數萬人中虜遂大  
敗陳侯安都以十二騎破齊陣禽其儀同乞伏無芳又  
刺東方老墜馬蕭摩訶與北齊戰於呂梁以七騎破齊  
軍奪其大旗及周滅齊遣將爭呂梁有精騎數千摩訶

領十二騎入周軍斬殺甚衆隋張須陁以五騎覘賊遇  
賊裴長才等二萬奄至圍之數百重力戰而出唐王君  
廓以十三人破郭士衡等兵一萬宋之梯應募擊驩州  
蠻與壯士八人被重甲大呼薄賊曰獠動卽死賊七百  
人皆不敢動遂平之金阿骨打以十人擊走遼兵於混  
同江劉整在宋時以十二人入金信陽軍擒其守時以  
爲唐李存孝以十八騎拔洛今整更少乃書其號曰養  
存孝元渾察征乞失哈里敵兵二千渾察以勇士五十  
人破之揚子橋之戰張宏範以十二騎渡水敗姜才軍  
明初洛水北之戰常遇春以單騎入元軍敵二十餘人  
刺之遇春殪其前鋒一人大呼馳入壯士從之敵遂大



潰傅友德攻山西擴廓萬騎突至友德以五十騎衝却之丁德興從攻洪山寨以百騎破賊數千成祖靖難兵起款台以十二騎破南兵三千人東昌之戰薛祿以五十騎敗南兵數百又皆古今所罕觀者也按癸辛雜識賈似道命廖瑩中刊奇奇集萃古人用兵以寡勝衆如赤壁淝水之類成一書蓋自託其援鄂之功也其書今不傳今姑撮諸史所載於此

取蜀將帥不利

洪容齋歷敘古來中國取蜀將帥多不利漢伐公孫述大將來歙岑彭俱被刺客之禍魏伐劉禪大將鍾會鄧艾皆族誅唐莊宗伐王衍招討使魏王繼岌大將郭崇

韜皆不得其死宋伐孟昶大將王全斌崔彥進皆不賞而受黜此北宋以前可歷歷數者也元憲宗率兵入蜀攻重慶被傷卒於釣魚山下明湯和傅友德取蜀和被鐫責不賞友德雖獲賞而終不得其死則取蜀將帥誠不利也

臨陣不自標異

淮南子云將軍不敢騎白馬蓋懼其易識也蒼梧雜志亦云古戎服上下一律皆赤色恐戰有傷殘或沮士氣故衣赤使血色不見也所以左傳有均服振振之語甕牖閒評亦云軍主不可自表暴以防敵人之窺伺也宋南渡以前戎服猶皆用緋紹興末乃變而用皂色云今

按左傳熒澤之戰衛侯不去其旗是以甚敗鄆陵之戰石首納旌於弢中得免南齊書殷孝祖臨戰以麾蓋自隨軍中相謂曰殷統軍可謂死將矣是日果中流矢死北史芒陰之戰高敖曹輕敵建麾蓋臨陣西人盡銳攻之遂爲魏所殺賀拔勝從周文望見高歡麾蓋出精兵擊之歡幾爲所獲王思政戰河橋從者死盡思政創重亦悶絕於積尸中思政久經軍陣每戰惟破衣敝甲敵人不疑其將帥故得免夜半而甦遂歸五代史周德威之擒陳野叉亦微服雜卒伍中伺野叉過以鐵鎚擊之墮馬遂擒之甕牖閱評王則叛貝州常裹花帽人見而識之遂擒獲至死終不去花帽宋史李成兒劉光世張

蓋行陣不介冑知爲主帥併兵圍之王德突圍擁光世出金史真人攻會州郭蝦蟆見其主兵者人馬皆衣金甲一箭殛之此古人遺法蓋陣上不自標異有急則易免難且可出人不意以制勝也然梁魏交戰韋叡乘板輿督勵將士勇氣無敵周齊芒山之戰周將蔡祐著明光鐵騎所向無前齊人咸曰此鐵虎也皆避之薛仁貴從征高麗未知名欲自顯乃着白衣持戟腰弓所向披靡太宗望見乃召之李晟圍朱泚於長安每戰必錦裘繡帽以自表韓世忠之圍淮揚也亦錦衣驄馬立陣前以致敵此又威名勇略足以懾敵不可以一律論者

解散降兵

爾朱榮既破擒葛榮其衆皆降爾朱令各從所樂親屬  
相隨任其居止於是數十萬衆一朝散盡待出百里外  
乃始分道押領隨便安置人服其處分機速唐書秦王  
世民破擒竇建德俘獲五萬人卽日散遣使還鄉里蓋  
乘其潰散之勢遣之使還莫不弭帖而去衆旣無主自  
不能復嘯聚爲亂而我亦免安插供饋之煩也

兵富難戰

後漢書度尙傳尙破賊卜陽潘鴻等猶未殄滅而士卒  
驕富莫有鬪志尙乃令軍中恣其出獵密使人潛焚其  
營珍積皆盡獵者歸皆泣因勞之曰賊財寶山積足富  
數世諸君但不努力耳乃人人爭奮大破平之

紙鳶木鵝畫獅

臺城之圍梁武以紙鳶告急於城外而援師莫有進者  
金守汴曰爲紙鳶置文書其上至北營則斷之以誘被  
俘者識者謂宰相以此退敵難矣然唐張仵守臨洛爲  
田悅等所攻馬燧等救兵未進仵急以紙鳶放過悅營  
悅射之不及乃落燧營言三日不救洛人且爲悅食燧  
等遂進解圍是紙鳶亦有時濟用隋東都被圍越王侗  
以木鵝隨水而下冀達江都求救而卒無救至明傅友  
德取蜀旣破階文以湯和兵在重慶無以通聲息乃作  
木鵝數百書取階文月日投之江順流而下和果得之  
遂進兵而全蜀俱下宋宗慤征林邑林邑以象來戰慤

曰吾聞獅子威服百獸乃製其形以鬪象果奔唐朱滔繪帛爲獅貌狀蒙以猛士數百馳入李維岳軍馬驚遂敗去明張輔征安南賊驅象來輔以畫獅蒙馬衝之賊亦潰然金石抹虎兒欲爲假獅以禦元兵作面具如獅狀以青麻爲尾繫大鈴於頭使敵馬驚駭張天綱笑之同一物也而異效如此

### 火馬火猱

左傳吳闔廬敗楚師至於郢楚王使鍼尹執燧象以奔吳師註火繫象尾也史記田單守卽墨收城中牛束兵刃於其角而灌脂束葦於尾燒其端縱之燕軍牛尾熱怒而奔燕壯士從之遂破燕軍此火牛燧象二事人所

共知也

宋王德討邵青亦用火牛德曰此古法也  
可一不可二乃萬矢齊發牛返奔遂破賊

後漢書楊璇爲零

陵守賊攻郡縣璇乃制馬車數十以囊盛石灰於車上繫布索於馬尾將馬居車前順風鼓灰因以火燒布布然馬驚盡突賊遂破之則又有用火馬者宋史趙適傳適攻晏州賊據輪縛大圍陡峭不可上適令士丁從山後挽藤葛而上得猱數十頭束麻灌以膏蠟縛於猱背及賊柵燃火炬猱熱狂跳賊廬舍皆茅竹猱竄其上火輒發遂破賊柵則并有用火猱者又前人未出之奇也

### 陷敵脫歸

李廣爲匈奴所得置兩馬間絡而盛之廣僞死覘其旁有一兒騎善馬忽騰而上因抱兒奔數十里取兒弓射

殺追者乃得脫其後有絕相類者南史宋魏交兵參軍  
王羅漢爲魏所擒鎖其頸使三郎將守之羅漢夜斷三  
郎將首抱鎖直歸北史後周李弼從周文帝與齊神武  
戰河橋爲齊所獲陽隕絕於地脫其旁有馬乃躍而上  
得免隋書麥鐵杖爲賊所擒賊帥李稜縛送高智慧行  
至凌亭衛者憇食鐵杖取賊刀殺衛者皆盡悉割其鼻  
懷之以歸唐書段志元從討王世充馬跌爲賊所擒兩  
騎夾持其髻將渡洛忽騰而上二人反墮復奪其馬馳  
歸明史顧成從攻鎮江與勇士十人入城被執十人皆  
死成躍起斷縛仆持刀者脫歸導衆入城克之靖難兵  
起薛祿戰敗爲平安所執奮脫縛拔刀殺守卒馳還復

戰

人事急爲僕隸免禍

左傳楚八子遇國難微服出亡將及門守門者難之其  
僕操箠擊公子背罵曰隸也不力何不早出守門者不  
疑竟出公羊傳云鞏之戰逢丑父面目與頃公相似代  
頃公當左使頃公取飲頃公操飲而至曰革取清者頃  
公用是佚而不反左傳亦同漢書王林卿通輕俠爲不  
法何並捕之林卿迫窘乃令奴冠其冠被其襜褕自代  
乘車而身自變服並斬奴頭而還三國志曹操圍呂布  
於濮陽城中大姓田氏爲反間操得入城及戰敗布騎  
追操問曰操何在操給之曰乘黃馬走者是也乃釋操

而操得出通鑑晉元帝睿初在鄴逃歸會成都王穎先  
敕諸關無得出貴人睿至河陽爲津吏所止從者宋典  
自後來以鞭拂睿笑曰舍長官禁貴人汝亦被拘耶吏  
乃聽過南史王慧龍家爲劉裕所誅慧龍年十四爲沙  
門僧彬所匿送之過江爲津人所疑彬曰此隨吾受業  
者乃免王華父厥從王恭起兵兵敗逃走華隨沙門釋  
曇冰逃使華提衣幘從後津邏咸疑焉華行遲曇冰罵  
曰奴子怠懈行不及我以杖捶華數十衆乃不疑遂免  
袁昂父覲旣敗昂藏於沙門沙門將以出關吏疑非常  
人沙門杖而詬之遂免北史西魏宇文泰與東魏侯景  
戰馬驚墜地東魏兵追及之左右皆散李穆以策扶泰

罵之曰籠東軍士爾曹主何在而獨留此追者不疑遂  
得逸唐宋泚之亂禁城門毋得出朝士朝士往往易服  
爲僕潛出事固有相類者

### 口打賊

五代史後唐諸將各自論功李嗣源獨無或問之嗣源  
曰諸君好以口擊賊嗣源但以手擊賊耳按此語亦有  
所本晉書西陽夷反太守楊珉會僚屬議拒賊朱伺獨  
無言珉問之伺曰諸人以舌擊賊伺惟以力耳唐書虢  
王巨傳安祿山反張垧薦巨有謀略召至京師楊國忠  
忌之謂曰比來人多以口打賊君不爾乎巨曰誰爲相  
公手打賊者歐陽史蓋本此也

丁公爲項王將逐漢高祖短兵接高祖急顧丁公曰兩賢豈相厄哉丁公乃引兵還慕容紹宗旣破侯景亟追之景使人謂曰景若就擒公復何用紹宗乃縱之又高歡使彭樂追宇文泰泰窘謂樂曰癡男子今日無我明日豈有汝耶遂還唐李寶臣討田承嗣屢立戰功朝廷遣中使勞之寶臣贈以百縑中使怒擲於道王武俊說寶臣曰令公新立功豈子尙爾若寇平後以一詔召歸闕下一匹夫耳不如釋承嗣以爲己資寶臣遂有玩寇之志宋威擊王仙芝等陰與會元裕謀曰昔龐勛滅康承訓卽得罪吾屬雖成功其能免乎不如留賊劉巨容

破黃巢於荆門或勸之窮追巨容曰國家好負人有人事則撫存將士事寧則棄之不如留賊以爲富貴之資又左良玉追張獻忠急獻忠遣其黨馬元利操重寶啗良玉曰獻忠在故公見重公所部多殺掠而閣部猜且專無獻忠卽公滅不久矣良玉心動縱之事極相類

懸賞購賊

宋夏竦判永興軍募擒趙元昊者爵萬戶侯元昊令募得竦者與錢三千明季楊嗣昌督師募擒斬張獻忠者資萬金爵侯翌日督師幕府自堂皇庖福遍題有斬督師者資白金三錢古今事固有相類者東魏高歡攻魏玉壁不能克乃射募格於城中云能斬城主降者拜大

尉封開國郡公賞帛萬匹城主韋孝寬手題書背返射  
城外云能斬高歡者準此安丙傳金人揭示境上得丙  
首者與銀絹二萬匹兩則猶未肆侮也

賊稱

晉書南燕載記泰山民王始聚眾僭號爲官兵所獲臨  
刑或問其父兄所在始曰太上皇蒙塵於外征東征西  
亂兵所害惟朕一身獨無聊賴其妻咎其正坐此口語  
始謂妻曰皇后自古豈有不亡之國哉五代史劉守光  
僭帝號爲唐莊宗所擒將刑守光乞哀不已其二妻李  
氏祝氏讓之曰皇帝事已如此生亦何益一呼其妻曰  
皇后一呼其夫曰皇帝正可作對也



